

MGA MISA SA KAOMAWAN NI DIVINO ROSTRO



# **MGA MISA SA KAOMAWAN NI DIVINO ROSTRO**

*Ad experimentum  
Ad usum Archidioecesis Cacerensis*


2020

# MGA MISA SA KAOMAWAN NI DIVINO ROSTRO

Nihil Obstat:

  
**Rev. Fr. Glenn C. Ruiz**  
Director, Comision sa Liturgia

Imprimatur:

  
**Most Rev. Rolando J. Tria Tirona, OCD, DD**  
Arzobispo kan Caceres

Ciudad nin Naga, Filipinas  
29 Agosto 2020, Memorial kan Pasion ni Juan Bautista

An Nihil Obstat asin Imprimatur iyo an pagpapatotoo na an librong ini daing anoman na sala na pag-doctrina o moral. An mga nasabing kapahayagan dai man nangangahulugan na an mga kagtao minauyon sa gabos na laman, tinutubodan o ipinapahayag kan libro.

Katanosan sa Pagsasadiri © 2020  
Archidiosis nin Caceres, Ciudad nin Naga, Filipinas

IPINUBLICAR KAN



**ROMANONG CATOLICONG ARCHIDIOCESIS NIN CACERES**

sa paagi kan Comision sa Liturgia asin Comision sa Comunicacion  
*Residencia kan Arzobispo, Elias Angeles St., Ciudad nin Naga, Filipinas*

# MGA LAOG

## **Propio kan Novenario asin Fiesta**

Divino Rostro (Banal na Lalawgon) 1

## **Pasunod-sunod sa Misa**

Rito sa Pagpoon 4  
Liturgia kan Tataramon 9  
Liturgia kan Eucaristia 13  
Pamibi sa Eucaristia I (Canon Romano) 16  
Pamibi sa Eucaristia II 24  
Pamibi sa Eucaristia III 29  
Pamibi sa Eucaristia IV 33  
Rito sa Pagcomunion 39  
Rito sa Pagtapos 43

## **Mga Pamibi sa Novena**

Enot na aldaw kan Novena 44  
Ikaduwang aldaw kan Novena 45  
Ikatolong aldaw kan Novena 46  
Ika-apat na aldaw kan Novena 47  
Ika-limang aldaw kan Novena 48  
Ika-anom na aldaw kan Novena 49  
Ika-pitong aldaw kan Novena 50  
Ika-walong aldaw kan Novena 51  
Ika-siyam na aldaw kan Novena 52  
Pamibi ki Divino Rostro 53

## **Mga Pamibi nin Banwaan**

Enot na aldaw 54  
Ikaduwang aldaw 56  
Ikatolong aldaw 58  
Ika-apat na aldaw 60  
Ika-limang aldaw 62  
Ika-anom na aldaw 64

Ika-pitong aldaw	66
Ika-walong aldaw	68
Ika-siyam na aldaw	70
Fiesta ni Divino Rostro	72
<b>Kadagdagan</b>	
Mga Babasahon sa Fiesta ni Divino Rostro	74
Pasasalamat	79
Bibliografia	79



ARCHIDIOCESIS NIN CACERES  
OPISINA KAN ARZOBISPO

**MENSAHE**

An celebracion kan Santa Misa iyo an pinakahalangkaw na gawe nin satong pagpamibi. An satong mga manlaen-laen na mga devocion angay na digdi magtapos. Sa Santa Misa satong nanunumpungan an Hawak asin Dugo kan satong Kagurangnan. Omawon niato an Dios sa Santa Misa na satong inoomaw sa paagi kan satong mga novena, mga procesion, pagsulo nin kandila, asin paghapiyap kan imagen ni Jesus.

Maogma akong ipresentar saindo an misal na ini para sa Mga Misa sa Kaomawan kan Banal na Lalawgon ni Jesus. Makatabang lugod ini tanganing mas dakul pang mga tawo na magkusog pa sa saindang pagkamoot ki Cristo. Makatabang lugod ini tanganing dakul pang magtalubo sa devocion sa Banal na Lalawgon ni Jesus.

Nagpapasalamat ako sa mga naghingowa tanganing mahimo an Misal na ini. Katuyuhan na maihiras ini sa kadaklan. Bako lang ining para sa mga Diocesis sa Bikol. An mga organizacion sa iba-ibang lugar sa kinaban na igwa nin celebracion kan kafiastian kan Banal na Lalawgon ni Jesus inaalok man na gamiton ini. Sa paagi kaini maipahiling niato an pagkasararô sa pag-omaw sa Banal na Lalawgon kan satong Kagurangnan.

Viva el Divino Rostro!

*Rolando J. Joven Tria Tirona, OCD*

✠ **Rolando Octavus Joven Tria Tirona, OCD, DD**  
Arzobispo kan Caceres



**PROPIO KAN NOVENARIO  
ASIN FIESTA**

Poon Miercoles kan Novena sagkod sa aldaw kan Fiesta

## **DIVINO ROSTRO** (BANAL NA LALAWGON)

Sa Misang ini, ginagamit an color na pula.

Sa ika-limang aldaw kan novenario iyo an Domingo kan Ordinariong panahon, an Misa kan aldaw isinecelebrar. Kun kinaugalian sa ibang lugar na kun saen an Misa novenario sinecelebrar sa ibang mga fetsa nin huli sa dahilan pastoral, ining propio kan novenario gagamiton.

### **Antifona sa Paglaog**

Fil 2, 8-9

Kan siya nagin tawo, nagpakumbaba siya  
asin nagmakinuyog-kuyog sagkod sa kagadanan,  
sagkod sa kagadanan kan cruz.  
Huli kaini, initaas siya nin Dios  
dangan tinawan nin ngaran na orog sa gabos na ngaran.

Pinapamibi an Kamurawayan sa Dios sa kaitaan (Gloria in excelsis).

### **Colecta**

**K**agurangnan Jesu Cristo,  
na an saimong orog kabanal na Lalawgon,  
na nakatago kan Pasion,  
siring kan saldang na nagbabanaag sa saiyang kusog,  
kaheraking warasan na, kaming nakikisumarô  
sa saimong mga pasakit sa dagâ,  
makapag-ogma sa kapahayagan  
kan saimong kamurawayan sa langit.  
Ika na nabubuhay asin naghahade, kaiba kan Dios Ama,  
kasarô kan Espiritu Santo,  
Dios, sa gabos na kapanahonan kan mga panahon.

### **Pamibi sa mga Dolot**

**H**ilnga, O Dios samong parasurog,  
asin mansáyi an Lalawgon kan saimong Cristo,  
na nagdolot saimo kan sadiri para samo bilang sacrificio,  
asin warasan na kaming nagdodolot  
kan daing-digtang sacrificio man sana,  
siring man magin tinutong na atang na maninigo saimo.  
Huli ki Cristo samong Kagurangnan.

## **Prefacio: An kapangganahan kan mamuraway na Cruz**

**P. An Kagurangnan mapa-saindo.**

**S. Asin sa saimong espiritu.**

**P. Iitaas an mga puso.**

**S. Initaas mi na sa Kagurangnan.**

**P. Magpasalamat kita sa Kagurangnan satuyang Dios.**

**S. Maninigo asin dapat.**

**T**otoong maninigo asin dapat, matanos asin nakakaligtas  
na danay asin minsan saen, magpasalamat kami saimo,  
Kagurangnan, Banal na Ama,  
Dios na makakamhan asin daing kasagkoran:

Ta tinogdas mo an kaligtasan nin katawohan sa kahoy kan Cruz,  
tanganing, kun saen an kagadanan nagsupang,  
duman an buhay mabangon giraray;  
asin, an nangdaog sa kahoy, sa kahoy man madadaog:  
huli ki Cristo samong Kagurangnan.

Huli saiya an mga Angeles nag-oomaw kan saimong kamahalan,  
nagsasamba an mga Dominaciones, nagtatakig an mga Potestades.  
An mga Virtudes kan kalangitan asin an mga banal na Serafines  
boronyog asin maogmang nagsecelebrar.

Auot pa man lugod na ipagboót mo  
na makasanong sainda an samong mga tingog,  
malodok na nagpapahayag nin pagtubod na nagsasabi:

**Banal, Banal, Banal an Kagurangnan Dios nin mga Hukbô . . .**

## **Antifona sa Comunion**

S 21, 17-81

Linabot ninda an sakong mga kamot saka bitis.  
Mabibilang ko an gabos kong tulang.

## **Pamibi Pakacomunion**

**K**agurangnan, namimibi kami,  
kaugaying paliwanagi kami kan saimong Lalawgon,  
tanganing kaming tinukdoan kan saimong mga katanosan,  
makalikay sa padagka kan kinaban  
huli kaining mga orog ka banal na misterio,  
asin, makalampas sa pag-usig kaini.  
Ika na nabubuhay asin naghahade  
sa kapanahonan kan mga panahon.

Pakatapos kan Pamibi Pakacomunion, pinapamibi an Pamibi kan Aldaw, pp. 00-00.

# **PASUNOD-SUNOD SA MISA**



# RITO SA PAGPOON

1. Kun tiripon na an banwaan, an Padi, kaiba an mga ministro, madolok sa altar, mantang an Awit sa Paglaog kinakanta.

Pag-abot sa altar, pakaduko nin hararom na kaiba an mga ministro, an padi mahadok sa altar sa pagtaong-galang, asin kun pagmarahayon, ma-incienso sa cruz asin sa altar. Dangan kaiba an mga ministro maduman sa tukawan.

Pakatapos na kantahon an Awit sa Paglaog, an padi asin an mga tawo, nakatindog, mapangurus; mantang nakaatubang sa mga tawo, an padi nagsasabi:

**Sa ngaran kan Ama, asin kan Aki, asin kan Espiritu Santo.**

An banwaan minasimbag:

Amen.

2. Dangan an padi, naka-onat an mga kamot, mataong galang sa banwaan, nagsasabi:

**An gracia ni Jesu Cristong Kagurangnan ta,**

**an pagkamoot kan Dios,**

**asin an pakisumarô kan Espiritu Santo mapa-saindo gabos.**

O:

**An gracia asin an katoninongan na gikan sa Dios satuyang Ama asin ki Jesu Cristong Kagurangnan mapa-saindo gabos.**

O:

**An Kagurangnan mapa-saindo.**

An banwaan minasimbag:

Asin sa saimong espiritu.

---

An obispo, embes kan An Kagurangnan mapa-saindo, nagsasabi sa enot na pagtaong-galang na ini nin:

**An katoninongan mapa-saindo.**

3. Sa pinakahalipot na mga tataramon, an padi, o an diacono o ibang ministro, makakapatarata sa banwaan kun ano an Misa sa aldaw na iyan.

## GAWE NIN PAGSOLSOL\*

4. **Dangan masunod an Gawe nin Pagsolsol; an banwaan inaalok kan padi na nagsasabi:  
Mga tugang, akoon ta an satong mga kasâlan,  
tanganing magkanigo kitang magcelebrar  
kan mga banal na misterio.**

Gigibohon an halipot na pagtoninong. Pakatapos an gabos durungan na mapangadyi kan nagkukumpisal ako:

**N**agkukumpisal ako sa Dios na makakamhan,  
asin saindo, mga tugang,  
ta nagkasalà ako nin makuri  
sa isip, sa tataramon, sa gibo, asin sa kapabayaan:

Asin tinotombok an daghan, sinda nagsasabi:  
salà ko, salà ko, makuring salà ko.

Dangan sinda minapadagos:

**Kaya nangangadyi ako ki Santa Maria, danay na Virgen,  
sa gabos na Angeles asin Santos,  
asin saindo, mga tugang,  
na ako ipamibi sa Kagurangnan tang Dios.**

Minasunod an absolucion kan padi:

**Maherak man lugod satô an Dios na makakamhan  
asin, pakapatawada an satong mga kasâlan,  
darahon kita sa buhay na daing kasagkoran.**

An banwaan minasimbag:

Amen.

---

\* Sa aldaw nin Domingo, orog na sa Panahon kan Pascua, embes kan kinaugalian na Gawe nin Pagsolsol, magigibo an pagbendicion asin pagwirik nin tubig sa pagromdom kan Bonyag (susog sa Mga Kadagdagan II sa Misal Romano) Cf. *Missale Romanum, editio typica tertia*, pp. 1249-1252.

---

O:

5. An padi inaalok an banwaan na gibohon an Gawe nin Pagsolsol:

**Mga tugang, akoon ta an satong mga kasâlan,  
tanganing magkanigo kitang magcelebrar  
kan mga banal na misterio.**

Gigibohon an halipot na pagtoninong.

Pakatapos, an padi nagsasabi:

**Maherak ka samo, Kagurangnan.**

An banwaan minasimbag:

Ta kami nagkasalâ saimo.

Padi:

**Ipahiling mo samo, Kagurangnan, an saimong pagkaherak.**

Banwaan:

Asin tawan samo an saimong kaligtasan.

Minasunod an absolucion kan padi:

**Maherak man lugod satô an Dios na makakamhan  
asin, pakapatawada an satong mga kasâlan,  
darahon kita sa buhay na daing kasagkoran.**

An banwaan minasimbag:

Amen.

---

O:

6. An padi inaalok an banwaan na gibohon an Gawe nin Pagsolsol:

**Mga tugang, akoon ta an satong mga kasâlan,  
tanganing magkanigo kitang magcelebrar  
kan mga banal na misterio.**

Masunod an halipot na pag-ontok na toninong.

Pakatapos, an padi, o an diacono o ibang ministro, sinasabi ining minasunod o iba pang pag-arang na yaon an Kagurangnan, maherak ka (Kýrie, eléison):

**Ika na sinugo sa pagpaomay kan mga nagsosolsol:**

**Kagurangnan, maherak ka.                    O:                    Kýrie, eléison.**

An banwaan minasimbag:

**Kagurangnan, maherak ka.                    O:                    Kýrie, eléison.**

**Padi:**

**Ika na nagdigdi sa pag-apod kan mga parakasalà:**

**Cristo, maherak ka. O: Christe, eléison.**

**Banwaan:**

**Cristo, maherak ka. O: Christe, eléison.**

**Padi:**

**Ika na nagtutukaw sa too kan Ama sa pagsurog samo:**

**Kagurangnan, maherak ka. O: Kýrie, eléison.**

**Banwaan:**

**Kagurangnan, maherak ka. O: Kýrie, eléison.**

**Minasunod an absolucion kan padi:**

**Maherak man lugod satô an Dios na makakamhan  
asin, pakapatawada an satong mga kasâlan,  
darahon kita sa buhay na daing kasagkoran.**

**An banwaan minasimbag:**

**Amen.**

- 
7. **Minasunod an mga pag-arang na Kagurangnan, Maherak ka (Kýrie, eléison), kun dai pa ini ginibo sa iba pang Gawe nin Pagsolsol.**

**P. Kagurangnan, maherak ka. S. Kagurangnan, maherak ka.**

**P. Cristo, maherak ka. S. Cristo, maherak ka.**

**P. Kagurangnan, maherak ka. S. Kagurangnan, maherak ka.**

**O:**

**P. Kýrie, eléison. S. Kýrie, eléison.**

**P. Christe, eléison. S. Christe, eléison.**

**P. Kýrie, eléison. S. Kýrie, eléison.**

8. *Dangan kun kaipuhan, kinakanta o pinapangadyi ining awit:*

**K**amurawayan sa Dios sa kaitaasan  
Asin sa dagâ katoninongan sa mga tawong marahay an boót.  
Inoomaw mi ika,  
rinorokyaw mi ika,  
sinasamba mi ika,  
pinapamuraway mi ika,  
pinapasalamatan mi ika huli kan dakula mong kamurawayan,  
Kagurangnan na Dios, Hadeng langitnon,  
Dios Amang makakamhan.  
Kagurangnan Aking Bogtong, Jesu Cristo,  
Kagurangnan na Dios, Cordero kan Dios, Aki kan Ama,  
ika na nagpaparà kan mga kasâlan kan kinaban,  
kaheraki kami;  
ika na nagpaparà kan mga kasâlan kan kinaban,  
akoa an samong pakimaherak;  
ika na nagtutukaw sa too kan Ama,  
kaheraki kami.  
Ta ika sana an Banal, ika sana an Kagurangnan,  
ika sana an Orog Kahalangkaw,  
Jesu Cristo, kaiba kan Espiritu Santo:  
sa kamurawayan kan Dios Ama.  
Amen.

9. *Pakatapos kan himno, an padi, bendito an mga kamot, nagsasabi:*

**Mamibi kita.**

*Asin an gabos, kaiba kan padi, minapangadyi na toninong sa halipot na panahon.*

*Dangan an padi, naka-onat an mga kamot, minapangadyi kan Colecta; kun tapos na, an banwaan nagsasabi sa makusog na tingog:*

Amen.

# LITURGIA KAN TATARAMON

10. Dangan an lector minaduman sa ambo asin minabasa kan Enot na Babasahon, mantang an gabos, nakatukaw, naghihinanyog.

Sa pagpaísi na tapos na an babasahon, an lector nagsasabi sa makusog na tingog:

**Tataramon kan Kagurangnan.**

Gabos minasimbag:

**Salamat sa Dios.**

11. An salmista, o cantor, nagkakanta o nagpapangadyi kan Salmo, mantang an banwaan an nagsisimbag.

12. Pakatapos, kun igwa nin Ikaduwang Babasahon, binabasa ini kan lector sa ambo, siring sa sinambit sa itaas.

Sa pagpaísi na tapos na an babasahon, an lector nagsasabi sa makusog na tingog:

**Tataramon kan Kagurangnan.**

Gabos minasimbag:

**Salamat sa Dios.**

13. Minasunod an Alleluia, o ibang awit susog sa mga rubrico na angay sa panahon kan liturgia.

14. Mantang ginigibo ini, an padi nagbubugtak nin incienso, kun ini ginagamit. Pakatapos, an diacono na marokyaw kan Evangelio, nakadukong hararom sa atubang kan Padi, naghahagad nin bendicion asin sa maluway na tingog nagsasabi:

**Pakibendicioni ako, kagurangnan.**

An padi sa hababang tingog nagsasabi:

**An Kagurangnan mapa-saimong puso asin ngimot:**

**tanganing maninigo asin husay mong irokyaw**

**an saiyang Evangelio:**

**sa ngaran kan Ama, asin kan Aki, ✠ asin kan Espiritu Santo.**

An diacono minapangurus asin minasimbag:

**Amen.**

Kun dai nin diacono, an padi, nakaduko sa atubang kan altar, sa hababang tingog nagsasabi:

**Dios na makakamhan, linigi an puso asin ngimot ko,**

**tanganing maninigo akong makapagrokyaw**

**kan banal mong Evangelio.**

15. Dangan an diacono, o an padi nagduduman sa ambo, asin kun pagmarahayon iniibahan kan mga ministro na dara an incienso asin mga kandila, asin nagsasabi:

**An Kagurangnan mapa-saindo.**

An banwaan minasimbag:

Asin sa saimong espiritu.

Diacono, o padi:

**Pagbasa kan banal na Evangelio susog ki N.,**

mantang nagtataram kaini, saiyang kinukrusan an libro, an saiyang angog, nguso asin daghan.

An banwaan nagrorokyaw:

Kamurawayan saimo, Kagurangnan.

Dangan an diacono o an padi nag-iincienso sa libro, kun ginagamit an incienso, asin nagrorokyaw kan Evangelio.

16. Kun tapos na an Evangelio, an diacono, o an padi, nagrorokyaw:

**Marahay na Bareta kan Kagurangnan.**

Gabos minasimbag:

Pag-omaw saimo, Cristo.

Dangan an libro hinahadokan mantang hilom na nagsasabi:

**Huli kan mga tataramon kan Evangelio  
maparà man lugod an satong mga kasâlan.**

17. Dangan isusunod an homilia, na dapat gibohon kan padi o diacono sa gabos na aldaw nin Domingo asin mga fiesta na ipinaglelehe; sa ibang mga aldaw, ini ipinagsasadol.

18. Sa pagtapos kan homilia, kinakanta o pinapangadyi an Simbolo o Panuga nin Pagtubod, kun ini kaipuhan:

**N**agtutubod ako sa sarong Dios,  
Amang makakamhan,  
kaggibo kan langit asin kan dagâ,  
kan gabos na nahihiling asin dai nahihiling.  
Asin sa sarong Kagurangnan na si Jesu Cristo,  
Bogtong na Aki kan Dios,  
asin namundag gikan sa Ama bâgo kan gabos na panahon.  
Dios na gikan sa Dios, Ilaw na gikan sa Ilaw,  
totoong Dios na gikan sa totoong Dios,  
ipinangaki, dai linalang, sarô sa pagka-Dios sa Ama:  
huli saiya nagkaigwa kan gabos.  
Huli sa satong mga tawo asin huli sa satong kaligtasan  
naghilig siya hale sa kalangitan.

Sa mga minasunod na tataramon, sagkod sa asin nani-tawo, an gabos minaduko.

Asin nani-laman huli kan Espiritu Santo ki Virgen Maria,  
asin nani-tawo.  
Ipinako pa sa cruz para satô kan panahon ni Poncio Pilato;  
nagtios sagkod sa kagadanan asin ilinobong,  
asin kan ikatolong aldaw nabuhay-liwat, susog sa mga Kasuratan,  
asin suminakat sa langit, nagtutukaw sa too kan Ama.  
Asin mamuraway na mabalik,  
sa paghukom sa mga buhay asin mga gadan,  
an saiyang kahadean daing kataposan.  
Asin sa Espiritu Santo, Kagurangnan asin kagtao nin buhay:  
na gikan sa Ama asin sa Aki.  
Siya, kaiba kan Ama asin kan Aki,  
sabay na sinasamba asin pinapamuraway:  
siya nagtaram sa paagi nin mga profetas.  
Asin sa sarô, banal, catolico asin apostolicong Simbahan.  
Nagpapahayag ako nin pagtubod sa sarong bonyag  
sa pagpatawad nin mga kasâlan.  
Asin naghahalat ako kan pagkabuhay-liwat nin mga gadan,  
asin kan buhay sa maabot na panahon. Amen.

19. Embes kan Credo Niceno-Constantinopolitano, orog na sa Panahon kan Cuaresma asin sa Panahon kan Pascua, magagamit man an Simbolo sa bonyag kan Simbahan Romano na inaapod man na Credo Apostolico:

**N**agtutubod ako sa Dios  
Amang makakamhan, Kaglalang kan langit asin dagâ,  
asin ki Jesu Cristo, Aking bogtong niya,  
Kagurangnan ta,

Sa mga minasunod na tataramon, sagkod ki Virgen Maria, an gabos minaduko.

ipinangidam huli kan Espiritu Santo,  
namundag ki Virgen Maria,  
pinasakitan kan panahon ni Poncio Pilato,  
ipinako sa cruz, nagadan, asin ilinubong,  
huminilig sa mga gadan,  
kan ikatolong aldaw nabuhay-liwat hale sa mga gadan,  
suminakat sa kalangitan,  
nagtutukaw sa too kan Dios Amang makakamhan,  
hale duman mabalik sa paghukom sa mga buhay asin mga gadan.  
Nagtutubod ako sa Espiritu Santo,  
sa banal na Simbahan na catolico,  
sa paropakianabang nin mga santos,  
sa pagpatawad nin mga kasâlan,  
sa pagkabuhay-liwat nin laman,  
sa buhay na daing kasagkoran. Amen.

20. Dangan pinapangadyi an Pamibi para sa Gabos, o an Pamibi nin Banwaan.

# LITURGIA KAN EUCARISTIA

21. Sa pagtapos kaini, pinopônan an Awit sa Ofertorio. Mantang nag-aawit an banwaan, an corporal, purificador, caliz, pallo asin misal ibinubugtak kan mga ministro sa altar.
22. Tamang gayo kun an mga tawo makapagpahiling kan saindang pakisumarô sa pagdolot kan atang, o dinadara sa atubang an hostia asin arak para sa celebracion kan Eucaristia, o iba pang mga atang na makakatabang sa mga pangangaipo kan Simbahan o kan mga dukha.
23. An padi, nakatindog sa may altar, kinukua an patena na may tinapay, asin sa duwang kamot iniitaas ini nin kadikit sa ibabaw kan altar asin sa hababang tingog nagsasabi:

**Inoomaw ka, Kagurangnan, Dios nin gabos na linalang,  
huli ta sa saimong pagkamatinao nag-ako  
kami nin tinapay, na idinodolot mi saimo,  
bunga kan dagâ asin kan gibo kan mga kamot nin mga tawo:  
ini magigin para samo tinapay nin buhay.**

Dangan ibinababa an patena na may hostia sa ibabaw kan corporal.

Alagad kun an Awit sa Ofertorio dai kinakanta, masasabi kan padi an mga tataramon na ini sa makusog na tingog; pakatapos, an banwaan makaka-pagrokyaw:

Pag-omawon an Dios sagkod pa man.

24. An diacono, o an padi, nagbubugtak kan arak asin dikit na tubig sa caliz, hilom na nagsasabi:

**Huli sa misterio kaining tubig asin arak  
magin man lugod kaming kahiras sa pagka-Dios niya,  
na nagpakumbabang magin kahiras sa samong pagka-tawo.**

25. Pakatapos kinukua kan padi an caliz, sa duwang kamot iniitaas ini nin kadikit sa ibabaw kan altar asin sa hababang tingog nagsasabi:

**Inoomaw ka, Kagurangnan, Dios nin gabos na linalang,  
huli kan saimong pagkamatinao nag-ako  
kami nin arak, na idinodolot mi saimo,  
bunga kan balagon asin kan gibo kan mga kamot nin mga tawo,  
ini magigin para samo inomon nin kalag.**

Dangan an caliz ibinababa sa ibabaw kan corporal.

Alagad kun an Awit sa Ofertorio dai kinakanta, masasabi kan padi an mga tataramon na ini sa makusog na tingog; pakatapos, an banwaan makaka-pagrokyaw:

Pag-omawon an Dios sagkod pa man.

26. Pakatapos, an padi nakaduko nin hararom, hilom na nagsasabi:  
**Sa kapakumbabaan asin pagsolsol  
 maako mo man lugod kami, Kagurangnan;  
 asin lugod an samuyang atang sa atubang mo ngonian,  
 maoyonan mo, Kagurangnan na Dios.**
27. Asin, kun pagmarahayon, an padi ma-incienco sa mga atang, sa cruz asin altar. Pakatapos an diacono o ibang ministro ma-incienco sa padi asin sa banwaan.
28. Dangan, nakatindog sa gilid kan altar, an padi naghahanaw kan kamot asin hilom na nagsasabi:  
**Hugasi ako, Kagurangnan, sa sakuyang karâtan,  
 asin linigi ako sa sakuyang kasâlan.**
29. Pakatapos, nakatindog sa tahaw kan altar, atubang sa banwaan, an padi inoonat an mga kamot, dangan benebendito kan mga kamot na nagsasabi:  
**Magpamibi kamo, mga tugang:  
 tanganing an sako asin an saindong atang  
 maako man lugod kan Dios Amang makakamhan.**
- An banwaan minatindog asin minasimbag:  
 Akoon man lugod kan Kagurangnan  
 an atang sa saimong mga kamot  
 para sa kaomawan asin kamurawayan kan saiyang ngaran,  
 para man sa pakinabang niato  
 asin kan bilog niyang banal sa Simbahan.
30. Dangan, naka-onat an mga kamot, an padi nagpapangadyi kan Pamibi sa mga Dolot; sa pagtapos, an banwaan nagrorokyaw:  
 Amen.

## PAMIBI SA EUCARISTIA

31. An padi nagpopoon kan Pamibi sa Eucaristia.

Naka-onat an mga kamot, siya nagsasabi:

**An Kagurangnan mapa-saindo.**

An banwaan minasimbag:

Asin sa saimong espiritu.

An padi, iniitaas an mga kamot, nagpapadagos:

**Iitaas an mga puso.**

Banwaan:

Initaas mi na sa Kagurangnan.

An padi, naka-onat an mga kamot, nagdadagdag:

**Magpasalamat kita sa Kagurangnan satuyang Dios.**

Banwaan:

Maninigo asin dapat.

Naka-onat an mga kamot, an padi nagpapadagos kan prefacio.

Sa kataposan kan prefacio, benebendito an mga kamot, asin kaiba an banwaan, tinatapos an prefacio, nagkakanta o sa malinaw na tingog nagsasabi:

**B**anal, Banal, Banal an Kagurangnan Dios nin mga Hukbô.  
**An langit asin dagâ panô kan saimong kamurawayan.**

**Hosánna sa kaitaasan.**

**Paladan an minadigdi sa ngaran kan Kagurangnan.**

**Hosánna sa kaitaasan.**

32. Sa gabos na Misa, tugot sa nagmimisang padi na kantahon an ibang kabtang kan Pamibi sa Eucaristia, orog na an mga mayor na kabtang kaini. Cf. *Missale Romanum, editio typica tertia*, p. 623ss.

Sa enot na Pamibi sa Eucaristia o sa Canon Romano, tugot na laktawan an mga yaon sa laog kan parenthesis.

# **MGA PAMIBI SA EUCARISTIA**



PAMIBI SA EUCARISTIA I  
(CANON ROMANO)

83. **P. An Kagurangnan mapa-saindo.**

**S.** Asin sa saimong espiritu.

**P. Iitaas an mga puso.**

**S.** Initaas mi na sa Kagurangnan.

**P. Magpasalamat kita sa Kagurangnan satuyang Dios.**

**S.** Maninigo asin dapat.

*Dangan, susog sa mga rubrico, isinusunod an gagamiton na Prefacio na minatapos sa:*

**B**anal, Banal, Banal an Kagurangnan Dios nin mga Hukbô.  
**A**n langit asin dagâ panô kan saimong kamurawayan.

**Hosánna sa kaitaasan.**

**Paladan an minadigdi sa ngaran kan Kagurangnan.**

**Hosánna sa kaitaasan.**

84. *An padi, naka-onat an mga kamot, nagsasabi:*

**K**aya maugayon na Ama, kaming nakikimaherak saimo,  
**nagpapamibi asin naghahagad,**  
**huli ki Jesu Cristong Aki mo,**  
**samong Kagurangnan,**

*Benebendito an mga kamot asin nagsasabi:*

**na akoon mo**

*Dungan na benebendicionan an hostia asin caliz, na nagsasabi:*

**asin bendicionan ✠ ining mga balaog, ining mga atang,**  
**ining mga banal na sacrificio na mayong kakundian,**

Naka-onat an mga kamot, nagpapadagos:

**na enot, idinodolot mi saimo  
para sa banal mong catolicong Simbahan:  
papagkanigoang mapatoninong mo siya,  
mabantayan, matipon asin mahadean sa bilog na kinaban:  
kaiba kan surogoon mong si **N.** na samong Papa  
asin kan obispo ming si **N.**\*  
patin kan gabos na nag-aataman susog sa katotoohan  
kan catolico asin apostolicong pagtubod.**

85. **Pagromdom sa mga Buhay.**

**Giromdoma, Kagurangnan, an mga surogoon mong si **N.** asin si **N.****

Benebendito an mga kamot asin nagpapamibi sa halipot na panahon para sa boót niyang ipamibi.

Dangan, naka-onat an mga kamot, nagpapadagos:

**asin an gabos na yaon digdi,  
na an pagtubod midbid mo asin an devocion aram mo,  
para sainda nagdodolot kami saimo:  
siring na sinda nagdodolot saimo kaining sacrificio nin pag-omaw  
para sa sainda man sana asin para sa gabos nindang katoód:  
para sa pagtubos kan saindang mga kalag,  
para sa paglaom kan saindang kaligtasan asin karahayan:  
sindang nag-uutob kan mga panuga ninda saimo  
Dios na daing kataposan, buhay asin totoo.**

---

\* Digdi mababanggit an Obispo Coadjutor, o Obispo Auxiliar, o ibang Obispo, siring sa pignotaran sa *Institutione Generali Missalis Romani*, n. 149.

86. **Infra Actionem.**

Sa pagparopakinaabang,  
asin magalang na pagromdom,  
enot, kan mamuraway na Maria, danay na Virgen,  
Ina kan Dios asin Kagurangnan niamong si Jesu Cristo:  
† siring man ki San José, Esposo kan iyo man sanang Virgen,  
asin kan saimong mga santos Apostoles asin Martires,  
ki Pedro asin Pablo, Andres,

(Santiago, Juan  
Tomas, Santiago, Felipe,  
Bartolomé, Mateo,  
Simon asin Tadeo:  
Lino, Cleto, Clemente, Sixto,  
Cornelio, Cipriano,  
Lorenzo, Crisógono,  
Juan asin Pablo,  
Cosmo asin Damian)

asin kan gabos mong mga Santos;  
huli kan saindang mga merito asin pamibi,  
itugot mong pakusogon kami kan tabang  
kan saimong pagsurog sa gabos na bagay.  
(Huli ki Cristo samong Kagurangnan. Amen.)

87. **Naka-onat an mga kamot, siya nagpapadagos:**

**Kaya ining dolot ni amo, bilang mga surogoon mo,  
siring man kan bilog mong familia,  
namimibi kami Kagurangnan,  
na magaya-gaya mong akoon:  
asin husayon mo an samong mga aldaw sa saimong katoninongan,  
dangan hâwason mo kami sa daing-tapos na padusa,  
asin ipagboót mo na kami makabilang  
sa katiriponan kan saimong mga pinili.**

**Benebendito an mga kamot.**

**(Huli ki Cristo samong Kagurangnan. Amen.)**

88. **Laob an mga kamot sa ibabaw kan mga atang, siya nagsasabi:**

**Namimibi kami, O Dios, na sa gabos na bagay,  
ining dolot papagkanigoon mong bendicionan,  
midbidon, parîgonon,  
gibohon na maninigo asin maoyonan:  
tanganing para samo  
magin Hawak asin Dugo kan Aki mong orog na namomotan,  
samong Kagurangnan Jesu Cristo.**

**Benebendito an mga kamot.**

89. **Sa mga minasunod na formula, an mga tataramon kan Kagurangnan sinasabing malinaw  
asin sayod, susog sa hinahagad kan siring na mga tataramon.**

**Bâgo kan aldaw kan Pasion,**

**Kinukua an tinapay,**

**asin iniitaas nin kadikit sa ibabaw kan altar, nagpapadagos:**

**nag-ako siya nin tinapay sa mga banal asin mahal niyang kamot,**

**Nagtitingkalag,**

**asin, initaas an mga mata sa langit,  
pasiring saimo, Dios Ama niyang makakamhan;  
pagpasalamat saimo, nagbendicion, binaak,  
asin tinao sa saiyang mga disipulos, na an sabi:**

**Minaduko nin kadikit.**

**MAG-AKO KAMO GABOS ASIN MAGKAKAN KAINI:  
TA INI AN SAKUYANG HAWAK,  
NA IDODOLOT PARA SAINDO.**

An sagradong hostia ibinabayaw sa banwaan, ibinabalik sa patena, asin an padi, nakaluhod an sarong tuhod, nagsasamba.

90. Pakatapos an padi nagpapadagos:

**Siring man, pakapamanggi,**

Kinukua an caliz,

iniitaas nin kadikit sa ibabaw kan altar, nagpapadagos:

**pag-ako niya kaining mahalagang caliz  
sa mga banal asin mahal niyang kamot;  
pagpasalamat giraray saimo, nagbendicion,  
tinao sa saiyang mga disipulos, na an sabi:**

Minaduko nin kadikit.

**MAG-AKO KAMO GABOS ASIN MAG-INOM KAINI:  
TA INI AN CALIZ KAN SAKUYANG DUGO  
KAN BÂGO ASIN DANAY NA TIPAN,  
NA PAPABOLOSAN PARA SAINDO ASIN PARA SA DAKUL  
SA PAGPATAWAD KAN MGA KASÂLAN.  
INI PAGGIBOHON NINDO SA PAGROMDOM SAKO.**

An caliz ibinabayaw sa banwaan, ibinababa sa corporal, asin an padi, nakaluhod an sarong tuhod, nagsasamba.

91. Dangan nagsasabi:

**Misterio kan pagtubod.**

Asin an banwaan minapadagos, nagrorokyaw:

An pagkagadan mo, Kagurangnan, ipinapamareta niamo,  
an pagkabuhay mo liwat ipinapahayag, sagkod na ika magdatong.

O:

Sa lambang pagkakan mi kaining tinapay  
asin pag-inom kan caliz,  
an pagkagadan mo, Kagurangnan, ipinapamareta niamo,  
sagkod na ika magdatong.

O:

Paraligtas kan kinaban, ligtasan kami,  
huli kan cruz asin pagkabuhay mo liwat, itinalingkas mo kami.

92. **Dangan, naka-onat an mga kamot, an padi nagsasabi:**

**Kaya, Kagurangnan,  
kami na saimong mga surogon,  
siring man an banal mong banwaan,  
ginigiromdom an paladan na pasion,  
an pagkabuhay-liwat sa mga gadan,  
asin man an mamuraway na pagsakat sa langit  
kan iyo man sanang Cristo, saimong Aki, samong Kagurangnan:  
nagdodolot sa saimong malinawon na kamahalan,  
hale sa mga balaog mong itinao,  
nin hostiang dalisay,  
hostiang banal,  
hostiang daing-digta,  
banal na Tinapay nin buhay na daing kasagkora,  
asin Caliz nin danay na kaligtasan.**

93. **Lilingya ini kan maugay asin matiwasay mong lalawgon:  
asin akoa an banal na sacrificio, daing-digtang hostia,  
siring na pinagkanigo mong maako  
an mga atang kan surogon mong suripot na si Abel,  
asin an sacrificio kan saimong Patriarca na si Abraham,  
asin an idinolot saimong orog kahalangkaw mong padi  
na si Melkisedek.**

94. **Bendito an mga kamot, nakaduko, an padi nagpapadagos:**

**Nakikimaherak kaming nagpapamibi saimong,  
Dios na makakamhan:  
ipagboót mo na ini darahon  
kan mga kamot kan banal mong Angel  
sa sinanglitan mong altar,  
sa atubang kan diosnon mong kamahalan;  
tanganing kaming nagpapakinabang  
kan orog kabanal na Hawak asin Dugo kan saimong Aki,  
sa pakikisumarô sa altar na ini,**

**An padi tindog na tanos, Minapangurus na nagsasabi:**

**anas mapanô man lugod  
kan gabos na langitnon na bendicion asin gracia.**

**Benebendito an mga kamot.**

**(Huli ki Cristo samong Kagurangnan. Amen.)**

95. **Pagromdom sa mga Gadan.**

**Naka-onat an mga kamot, nagsasabi:**

**Giromdoma man, Kagurangnan,  
an mga surogon mong si **N.** asin si **N.**,  
na naenot na samo, may tanda nin pagtubod,  
asin nagtuturog sa katoninongan.**

**Bendito an mga kamot asin nagpapamibi sa halipot na panahon para sa mga gadan na ini  
na boót niyang ipamibi.**

**Dangan naka-onat an mga kamot, nagpapadagos:**

**Nag-aarang kami, Kagurangnan,  
na sinda asin an gabos na nagpapahingalo ki Cristo,  
matawan mo nin lugar asin kaginhawahan,  
liwanag asin katoninongan.**

**Benebendito an mga kamot.**

**(Huli ki Cristo samong Kagurangnan. Amen.)**

96. **Tinutumbok kan toong kamot an daghan na nagsasabi:**

**Kami man na mga surogon mong parakasalà,**

**Asin naka-onat an mga kamot, nagpapadagos:**

**naglalaom sa dakula mong pagkamaheherakon,  
papagkanigoon mong matawan nin kahirasan  
sa pag-iriba kan mga banal mong Apostoles asin Martires:  
Juan, Esteban,**

**Matías, Bernabé**

**(Ignacio, Alejandro,**

**Marcelino, Pedro,**

**Felicidad, Perpetua,**

**Águeda, Lucia,**

**Inés, Cecilia, Anastacia)**

**asin gabos mong mga Santos:**

**namimibi kami, akoon mo kami**

**sa saindang pag-iriba,**

**ika, na dai nagtitimbang nin mga merito**

**kundi bulanos na nagwawaras nin kapatawadan.**

**Benebendito an mga kamot.**

**Huli ki Cristo samong Kagurangnan.**

97. **Asin nagpapadagos:**

**Huli saiya, Kagurangnan,  
ini gabos na karahayan danay mong linalalang,  
pinapabanal, binubuhay, benebendicionan,  
asin samong iwinawaras.**

98. **Kinukua an patena na may hostia asin an caliz, asin dungan na ibinabayaw na nagsasabi:**

**Huli saiya, asin kaiba niya, asin sa saiya,  
saimo Dios Amang makakamhan,  
kasarô kan Espiritu Santo,  
an gabos na kagalangan asin kamurawayan,  
sa gabos na kapanahonan kan mga panahon.**

**An banwaan nagrorokyaw:**

**Amen.**

**Dangan minasunod an Rito sa Pagcomunion, p. 39.**

## PAMIBI SA EUCARISTIA II

99. Dawa igwang sadiring prefacio ining Pamibi sa Eucaristia, magagamit man digdi an iba pang mga prefacio, orog na idtong mga nagpapahayag kan kabilogan kan misterio nin kaligtasan, arog baga kan mga prefacio comun.

**P. An Kagurangnan mapa-saindo.**

**S.** Asin sa saimong espiritu.

**P. Iitaas an mga puso.**

**S.** Initaas mi na sa Kagurangnan.

**P. Magpasalamat kita sa Kagurangnan satuyang Dios.**

**S.** Maninigo asin dapat.

**T**otoong maninigo asin dapat, matanos asin nakakaligtas,  
na danay asin minsan saen, magpasalamat kami saimo,  
banal na Ama, huli kan namomotan mong Aking si Jesu Cristo,  
an saimong Tataramon na iginibo mo kan gabos:  
sinugo mong Paraligtas asin Paratubos para samo,  
nani-laman sa bagsik kan Espiritu Santo,  
asin namundag sa Virgen.

Sa pag-utob kan saimong kabôtan,  
asin sa pagtipon para saimo nin banal na banwaan,  
nagdupa siya kan pinapasakitan,  
tanganing daogon an kagadanan  
asin ipahayag an pagkabuhay-liwat.

Kaya, kaiba kan mga Angeles asin kan gabos na Santos  
naghaharubay kami kan saimong kamurawayan,  
sarong tingog na nagsasabi:

**Banal, Banal, Banal an Kagurangnan Dios nin mga Hukbô.**

**An langit asin dagâ panô kan saimong kamurawayan.**

**Hosánna sa kaitaasan.**

**Paladan an minadigdi sa ngaran kan Kagurangnan.**

**Hosánna sa kaitaasan.**

100. An padi, naka-onat an mga kamot, nagsasabi:

**K**agurangnan, ika nanggad an Banal,  
burabod nin gabos na kabanalan.

101. Benebendito an mga kamot, dangan laob an mga ini sa ibabaw kan mga atang, siya nagsasabi:

**Kaya ining mga atang, namimibi kami,  
pabanala kan ambon kan saimong Espiritu,**

Benebendito an mga kamot

asin dungan na benebendicionan an hostia asin caliz na nagsasabi:

**tanganing para samo maging Hawak asin ✠ Dugo  
kan samong Kagurangnan na si Jesu Cristo.**

Benebendito an mga kamot.

102. Sa mga minasunod na formula, an mga tataramon nin Kagurangnan sinasabing malinaw asin sayod, susog sa hinahagad kan siring na mga tataramon.

**Kan siya, sa rogaring niyang boót, pinasaluiban sagkod sa Pasion,**

Kinukua an tinapay,

asin iniitaas nin kadikit sa ibabaw kan altar, nagpapadagos:

**nagkua siya nin tinapay, asin pagpasalamat, binaak ini,  
asin tinao sa saiyang mga disipulos, na an sabi:**

Minaduko nin kadikit.

**MAG-AKO KAMO GABOS ASIN MAGKAKAN KAINI:**

**TA INI AN SAKUYANG HAWAK,**

**NA IDODOLOT PARA SAINDO.**

An sagradong hostia ibinabayaw sa banwaan, ibinabalik sa patena, asin an padi, nakaluhod an sarong tuhod, nagsasamba.

103. *Pakatapos an padi nagpapadagos:*

**Siring man, pakapamanggi,**

*Kinukua an caliz,*

*iniitaas nin kadikit sa ibabaw kan altar, nagpapadagos.*

**pagkua niya man nin caliz,**

**asin giraray pagpasalamat saimo, tinao sa saiyang mga disipulos,**

**na an sabi:**

*Minaduko nin kadikit.*

**MAG-AKO KAMO GABOS ASIN MAG-INOM KAINI:**

**TA INI AN CALIZ KAN SAKUYANG DUGO**

**KAN BÂGO ASIN DANAY NA TIPAN,**

**NA PAPABOLOSAN PARA SAINDO ASIN PARA SA DAKUL**

**SA PAGPATAWAD KAN MGA KASÂLAN.**

**INI PAGGIBOHON NINDO SA PAGROMDOM SAKO.**

*An caliz ibinabayaw sa banwaan, ibinababa sa corporal, asin an Padi, nakaluhod an sarong tuhod, nagsasamba.*

104. *Dangan nagsasabi:*

**Misterio kan pagtubod.**

*Asin an banwaan minapadagos, nagrorokyaw:*

An pagkagadan mo, Kagurangnan, ipinapamareta niamo,

an pagkabuhay mo liwat ipinapahayag, sagkod na ika magdatong.

**O:**

Sa lambang pagkakan mi kaining tinapay

asin pag-inom kan caliz,

an pagkagadan mo, Kagurangnan, ipinapamareta niamo,

sagkod na ika magdatong.

**O:**

Paraligtas kan kinaban, ligtasan kami,

huli kan cruz asin pagkabuhay mo liwat, itinalingkas mo kami.

105. **Dangan, naka-onat an mga kamot, an padi nagsasabi:**

**Kaya kami na nagroromdom  
kan saiyang pagkagadan asin pagkabuhay-liwat,  
nagdodolot saimo, Kagurangnan,  
kan tinapay nin buhay asin caliz nin kaligtasan,  
nagpapasalamat ta pinapagkanigo mo  
na mag-atubang asin maglingkod saimo.**

**Asin nakikimaherak kaming nag-aarang,  
na kaming nagpapakinabang kan Hawak asin Dugo ni Cristo  
pagsararoon kan Espiritu Santo.**

**Giromdoma, Kagurangnan, an saimong Simbahan  
na nakalakop sa bilog na kinaban,  
tanganing malubos mo siya sa pagkamoot  
kaiba kan samong Papa si **N.** asin kan samong Obispo, si **N.\***  
asin kan gabos na clero.**

**Siring man giromdoma sa saimong pagkaherak,  
an samong mga tugang  
na nagturog sa paglaom kan pagkabuhay-liwat,  
asin an gabos na mga gadan,  
dangan akoa sinda sa liwanag kan saimong lalawgon.  
Kaheraki kami gabos, namimibi kami,  
tanganing kaiba ni Santa Maria, Virgen na Ina kan Dios,  
kaiba ni San José, saiyang Esposo,  
kan mga banal na Apostoles  
asin gabos na Santos na kaidto pa nakapagaya-gaya saimo,  
magkanigong magin kahiras kan buhay na daing kasagkoran,  
mag-omaw asin magpamuraway saimo siring man**

**Benebendito an mga kamot.**

**huli sa Aki mong, si Jesu Cristo.**

---

\* Digdi mababanggit an Obispo Coadjutor, o Obispo Auxiliar, o ibang Obispo, siring sa pignotaran sa *Institutione Generali Missalis Romani*, n. 149.

106. Kinukua an patena na may hostia asin an caliz, asin dungan na ibinabayaw na nagsasabi:

**Huli saiya, asin kaiba niya, asin sa saiya,  
saimo Dios Amang makakamhan,  
kasarô ka Espiritu Santo,  
an gabos na kagalangan asin kamurawayan,  
sa gabos na kapanahonan kan mga panahon.**

An banwaan nagrorokyaw:

Amen.

Dangan minasunod an Rito sa Pagcomunion, p. 39.

## PAMIBI SA EUCARISTIA III

107. **P. An Kagurangnan mapa-saindo.**

**S.** Asin sa saimong espiritu.

**P. Iitaas an mga puso.**

**S.** Initaas mi na sa Kagurangnan.

**P. Magpasalamat kita sa Kagurangnan satuyang Dios.**

**S.** Maninigo asin dapat.

*Dangan, susog sa rubrico, isinusunod an gagamiton na Prefacio na minatapos:*

**Banal, Banal, Banal an Kagurangnan Dios nin mga Hukbô.**

**An langit asin dagâ panô kan saimong kamurawayan.**

**Hosánna sa kaitaasan.**

**Paladan an minadigdi sa ngaran kan Kagurangnan.**

**Hosánna sa kaitaasan.**

108. *An padi, naka-onat an mga kamot, nagsasabi:*

**K**agurangnan, ika naggad an Banal,  
**K**asin an gabos na linalang na inaataman mo  
maninigong nag-oomaw saimo,  
huli ta sa saimong Aki,  
samong Kagurangnan, Jesu Cristo  
sa bagsik asin kusog kan Espiritu Santo,  
binubuhay asin pinapabanal mo an gabos,  
asin dai ka nag-oontok sa pagtipon kan banwaan para saimo,  
tanganing poón pagsirang sagkod pagsolnop kan saldang  
malinig na atang ikadolot sa saimong ngaran.

109. *Benebendito an mga kamot, dangan laob an mga ini sa ibabaw kan mga atang, siya nagsasabi:*

**Kaya, Kagurangnan, kami nakikimaherak na nag-aarang saimo,  
na ining mga atang na dinara mi saimo tanganing mabendicionan,  
papagkanigoang pabanalon kan iyo man sanang Espiritu,**

*Benebendito an mga kamot*

*asin dungan na benebendicionan an hostia asin caliz na nagsasabi:*

**tanganing magin Hawak asin ✠ Dugo**

**kan saimong Aki, samong Kagurangnan Jesu Cristo:**

*Benebendito an mga kamot.*

**sa saiyang pagboót sinecelebrar mi ining mga misterio.**

110. Sa mga minasunod na formula, an mga tataramon nin Kagurangnan sinasabing malinaw asin sayod, susog sa hinahagad kan siring na mga tataramon.

**Ta kan banggi na siya pinasaluiban,**

Kinukua an tinapay,

asin iniitaas nin kadikit sa ibabaw kan altar, nagpapadagos:

**nagkua siya nin tinapay**

**asin pagpasalamat saimo, nagbendicion,**

**binaak, asin tinao sa saiyang mga disipulos, na an sabi:**

Minaduko nin kadikit.

**MAG-AKO KAMO GABOS ASIN MAGKAKAN KAINI:**

**TA INI AN SAKUYANG HAWAK,**

**NA IDODOLOT PARA SAINDO.**

An sagradong hostia ibinabayaw sa banwaan, ibinabalik sa patena, asin an padi, nakaluhod an sarong tuhod, nagsasamba.

111. Pakatapos an padi nagpapadagos:

**Siring man, pakapamanggi,**

Kinukua an caliz,

iniitaas nin kadikit sa ibabaw kan altar, nagpapadagos.

**pagkua niya man nin caliz**

**asin pagpasalamat saimo, nagbendicion,**

**asin itinao sa saiyang mga disipulos, na an sabi:**

Minaduko nin kadikit.

**MAG-AKO KAMO GABOS ASIN MAG-INOM KAINI:**

**TA INI AN CALIZ KAN SAKUYANG DUGO**

**KAN BÂGO ASIN DANAY NA TIPAN,**

**NA PAPABOLOSAN PARA SAINDO ASIN PARA SA DAKUL**

**SA PAGPATAWAD KAN MGA KASÂLAN.**

**INI PAGGIBOHON NINDO SA PAGROMDOM SAKO.**

An caliz ibinabayaw sa banwaan, ibinababa sa corporal, asin an padi, nakaluhod an sarong tuhod, nagsasamba.

112. Dangan nagsasabi:

**Misterio kan pagtubod.**

Asin an banwaan minapadagos, nagrorokyaw:

An pagkagadan mo, Kagurangnan, ipinapamareta niamo,

an pagkabuhay mo liwat ipinapahayag, sagkod na ika magdatong.

O:

Sa lambang pagkakan mi kainang tinapay  
asin pag-inom kan caliz,  
an pagkagadan mo, Kagurangnan, ipinapamareta niamo,  
sagkod na ika magdatong.

O:

Paraligtas kan kinaban, ligtasan kami,  
huli kan cruz asin pagkabuhay mo liwat, itinalingkas mo kami.

113. **Dangan, naka-onat an mga kamot, an padi nagsasabi:**

**Kaya, Kagurangnan, kami na nagroromdom  
kan nakakaligtas na pasion kan saimong Aki  
asin kan makangangalas na pagkabuhay-liwat  
patin pagsakat sa langit,  
siring man kaming naghahalat kan saiyang ikaduwang pagdatong,  
nagpapasalamat na nagdodolot saimo  
kainang buhay asin banal na sacrificio.**

**Lilingya, namimibi kami, an dolot kan saimong Simbahan  
asin sa pagmidbid mo kan Hostia,  
na sa pagsacrificio kaiyan, minawot mong maulian boót,  
itugot mo na kaming binabâgo kan Hawak asin Dugo  
kan saimong Aki,  
panô kan saiyang Espiritu Santo,  
maabtan man lugod  
na sarong hawak asin sarong espiritu ki Cristo.**

**Gibohon niya lugod kaming daing sagkod na dolot saimo,  
tanganing kaiba kan saimong mga pinili  
makamtan mi an pamana,  
enot, kaiba kan orog kapalad na Virgen Maria, Ina kan Dios,  
kaiba ni San José, saiyang Esposo,  
kaiba kan saimong mga santos Apostoles  
asin mamuraway na Martires  
(kaiba ni N.: **Santo/a kan aldaw o patron/a**)  
patin gabos na mga Santos:  
sa danay nindang pagsurog sa atubang mo  
nagsasarig kaming matabangan.**

Ining Hostia kan samong pakipag-olían,  
namimibi kami, Kagurangnan,  
makapauswag man lugod kan katoninongan  
asin kaligtasan sa bilog na kinaban;  
an saimong Simbahan, na nagbabaklay sa dagâ,  
papagkanigoang magsarig sa pagtubod asin pagkamoot  
kaiba kan saimong surogon si **N.** samong Papa  
asin kan samong Obispo si **N.**,  
kaiba kan gabos na Obispo,  
asin gabos na clero, asin kan bilog na banwaan na tinipon mo.

Kaugayi an mga panuga kaining familia,  
na binoót mong maki-atubang saimo.  
Maugayon na Ama, kaheraking pagsararoa saimo,  
an gabos mong aki saen man sinda nakawarak.

† An mga tugang niamong gadan  
asin an gabos na nagpapagaya-gaya saimo,  
na nagtalikod na sa panahon na ini,  
maboót mong akoon sa saimong kahadean,  
naglalaom kaming makakaduman,  
tanganing sarabay kaming mapanô sagkod pa man  
kan saimong kamurawayan,

*Benebendito an mga kamot.*

huli ki Cristo samong Kagurangnan,  
sa paagi niya iwinawaras mo an gabos na karahayan sa kinaban. †

114. *Kinukua an patena na may hostia asin an caliz, asin dungan na ibinabayaw na nagsasabi:*

Huli saiya, asin kaiba niya, asin sa saiya,  
saimo Dios Amang makakamhan,  
kasarô ka Espiritu Santo,  
an gabos na kagalangan asin kamurawayan,  
sa gabos na kapanahonan kan mga panahon.

*An banwaan nagrorokyaw:*

Amen.

*Dangan minasunod an Rito sa Pagcomunion, p. 39.*

---

\* Digdi mababanggit an Obispo Coadjutor, o Obispo Auxiliar, o ibang Obispo, siring sa pignotaran sa *Institutione Generali Missalis Romani*, n. 149.

## PAMIBI SA EUCARISTIA IV

116. Dai tugot na ribayan an prefacio kaining Pamibi sa Eucaristia huli ta sa pasunod-sunod kaining pamibi nagpapahayag kan kabilogan kan kasaysayan kan kaligtasan.

**P. An Kagurangnan mapa-saindo.**

**S.** Asin sa saimong espiritu.

**P. Iitaas an mga puso.**

**S.** Initaas mi na sa Kagurangnan.

**P. Magpasalamat kita sa Kagurangnan satuyang Dios.**

**S.** Maninigo asin dapat.

**T**otoong maninigo na magpasalamat saimo,  
dapat naggad na pamurawayon ka, banal na Ama,  
huli ta ika Dios, sarô, buhay asin totoo,  
ika, na dati na bâgo kan mga panahon  
asin nagdadanay sagkod pa man,  
nag-eerok sa liwanag na dai madodolok;  
alagad ika, na iyo sana an marahay, asin burabod nin buhay,  
ginibo mo an gabos,  
tanganing panoon mo an saimong mga linalang nin mga biyaya  
asin paogmahon an dakul kan bangraw kan saimong liwanag.

Kaya, an dai mabilang na hukbô nin mga Angeles  
nagtitindog sa atubang mo, naglilingkod saimo aldaw-banggi  
asin, nakatingkalag sa kamurawayan kan saimong lalawgon  
daing ontok na nagpapamuraway saimo.

Kaiba ninda, kami man, asin huli sa samong tingog,  
an gabos na linalang sa irarom kan langit  
maogmang nagrorokyaw kan saimong ngaran mantang nag-aawit:

**Banal, Banal, Banal an Kagurangnan Dios nin mga Hukbô.**

**An langit asin dagâ panô kan saimong kamurawayan.**

**Hosánna sa kaitaasan.**

**Paladan an minadigdi sa ngaran kan Kagurangnan.**

**Hosánna sa kaitaasan.**

117. An padi, naka-onat an mga kamot, nagsasabi:

**B**anal na Ama, minimidbid mi ika,  
huli ta ika dakula, asin an gabos mong nahaman,  
sa kadonongan asin pagkamoot mo ginibo.  
Hinimo mo an tawo sa saimong ladawan,  
asin ipinaniwala mo saiya an pag-ataman kan bilog na kinaban,  
tanganing sa paglingkod saimo na iyo sana an Kaglalang,  
siya magboót sa gabos na linalang.  
Asin kan mawara saiya an pakipagkatoód mo,  
sa dai niya pagkuyog,  
dai mo siya pinabayaan sa kapangyarihan nin kagadanan.  
Ta ika sa pagkaherak nagsanggawad sa gabos,  
tanganing makua ka kan mga naghahanap saimo.  
Balakid na nakipagtipan ka pa ngani sa mga tawo  
asin huli sa mga profeta  
tinukdoan mo sindang maglaom kan kaligtasan.  
Asin siring, banal na Ama, namoot ka sa kinaban,  
tanganing sa kapanoan nin mga panahon,  
sugoon mo samo an Bugtong mong Aki na Paraligtas.  
Siya na nani-laman sa bagsik kan Espiritu Santo  
asin namundag ki Virgen Maria,  
nakisumarô sa kamugtakan niamo  
sa gabos na bagay maliban sa kasâlan;  
siya namareta kan kaligtasan sa mga dukha,  
pagtubos sa mga bihag,  
kaogmahan sa mga nagmumundo.  
Alagad tanganing mautob an saimong kaisipan,  
pinaubaya niya an sadiri sa kagadanan  
asin sa pagbangon hale sa mga gadan,  
rinompag niya an kagadanan, asin binâgo an buhay.  
Asin tanganing mabuhay kami, bako na para samo man sana,  
kundi para saiya na nagadan asin nabuhay-liwat para samo,  
sinugo niya an Espiritu Santo gikan saimo Ama,  
bilang tinagba sa mga nagtutubod,  
tanganing sa paghaman kan gibo niya sa kinaban,  
mautob an lubos na pagpabanal.

118. *Benebendito an mga kamot, dangan laob an mga kamot sa ibabaw kan atang, siya nagsasabi:*

**Kaya, Kagurangnan, nagpapamibi kami,  
na papagkanigoon kan iyo man sanang Espiritu Santo  
na pabanalon ining mga atang,**

*Benebendito an mga kamot asin dungan na benebendicionan an hostia asin caliz na nagsasabi:*

**tanganing magin Hawak ✠ asin Dugo  
kan Kagurangnan niamong si Jesu Cristo**

*Benebendito an mga kamot.*

**sa pagcelebrar kainig dakulang misterio  
na saiya man sanang iwinalat samo  
na magin tipan na daing kasagkoran.**

119. *Sa mga minasunod na formula, an mga tataramon nin Kagurangnan sinasabing malinaw asin sayod, susog sa hinahagad kan siring na mga tataramon.*

**Ta, pag-abot kan oras,  
tanganing pamurawayon mo, banal na Ama,  
siya namoot sa saiyang mga disipulos na yaon sa kinaban,  
namoot sinda sagkod sa kataposan,  
asin mantang sinda nagpapamanggi**

*Kinukua an tinapay,  
asin iniitaas nin kadikit sa ibabaw kan altar, nagpapadagos:*

**nagkua nin tinapay, nagbendicion asin binaak,  
tinao sa saiyang mga disipulos, na an sabi:**

*Minaduko nin kadikit.*

**MAG-AKO KAMO GABOS ASIN MAGKAKAN KAINI:  
TA INI AN SAKUYANG HAWAK,  
NA IDODOLOT PARA SAINDO.**

*An sagradong hostia ibinabayaw sa banwaan, ibinabalik sa patena, asin an padi, nakaluhod an sarong tuhod, nagsasamba.*

120. Pakatapos an padi nagpapadagos:

**Siring man,**

Kinukua an caliz,

iniitaas nin kadikit sa ibabaw kan altar, nagpapadagos.

**pagkua nin caliz, na panô nin bunga nin balagon,  
nagpasalamat saiya, asin itinao sa saiyang mga disipulos,  
na an sabi:**

Minaduko nin kadikit.

**MAG-AKO KAMO GABOS ASIN MAG-INOM KAINI:  
TA INI AN CALIZ KAN SAKUYANG DUGO  
KAN BÂGO ASIN DANAY NA TIPAN,  
NA PAPABOLOSAN PARA SAINDO ASIN PARA SA DAKUL  
SA PAGPATAWAD KAN MGA KASÂLAN.  
INI PAGGIBOHON NINDO SA PAGROMDOM SAKO.**

An caliz ibinabayaw sa banwaan, ibinababa sa corporal, asin an padi, nakaluhod an sarong tuhod, nagsasamba.

121. Dangan nagsasabi:

**Misterio kan pagtubod.**

Asin an banwaan minapadagos, nagrorokyaw:

An pagkagadan mo, Kagurangnan, ipinapamareta niamo,  
an pagkabuhay mo liwat ipinapahayag, sagkod na ika magdatong.

O:

Sa lambang pagkakan mi kaining tinapay  
asin pag-inom kan caliz,  
an pagkagadan mo, Kagurangnan, ipinapamareta niamo,  
sagkod na ika magdatong.

O:

Paraligtas kan kinaban, ligtasan kami,  
huli kan cruz asin pagkabuhay mo liwat, itinalingkas mo kami.

122. **Dangan, naka-onat an mga kamot, an padi nagsasabi:**

**Kaya, Kagurangnan, mantang kami nagecelebrar ngonian  
kan memorial kan pagtubos samo, ginigiromdom niamo  
an pagkagadan ni Cristo,  
asin an saiyang paghilig sa mga gadan,  
ipinahayag niamo an saiyang pagkabuhay-liwat,  
asin an saiyang pagsakat sa langit sa too mo,  
dangan, mantang naghahalat kan mamuraway niyang pagdatong,  
idinodolot mi saimo an saiyang Hawak asin Dugo,  
sacrificiong maoyonan mo asin nakakaligtas sa bilog na kinaban.**

**Lilingya, Kagurangnan, an Hostia,  
na saimo man sanang inandam para sa saimong Simbahan,  
asin maboót na iwaras mo sa gabos na nakikihiras  
sa sarong tinapay na ini asin caliz,  
tanganing tinipon kan Espiritu Santo sa sarong hawak,  
malubos ki Cristo, buhay na hostia,  
para sa kaomawan kan saimong kamurawayan.**

**Kaya ngonian, Kagurangnan, giromdoma  
an gabos na huli sainda idinodolot mi saimo ining atang:  
orog na an saimong surogoon, na samong Papa si **N.**,  
an samong Obispo si **N.\*** asin an gabos na mga Obispo,  
siring man an gabos na clero,  
asin an mga nagdodolot,  
asin an mga nagkakatiripon digdi,  
asin an bilog mong banwaan,  
patin an gabos na naghahanap saimo nin udók sa boót.**

**Siring man giromdoma  
an mga nagadan sa katoninongan kan saimong Cristo,  
asin an gabos na mga gadan,  
na an pagtubod ika sana an nakaaram.**

---

\* Digdi mababanggit an Obispo Coadjutor, o Obispo Auxiliar, o ibang Obispo, siring sa pignotaran sa *Institutione Generali Missalis Romani*, n. 149.

**Maugayon na Ama, itugot mo samo gabos, saimong mga aki,  
na makamtan niamo an langitnon na pamana  
kaiba kan paladan na Virgen Maria, Ina kan Dios,  
kaiba ni San José, saiyang Esposo,  
kaiba kan mga Apostoles asin saimong mga Santos  
sa saimong kahadean, kun saen, kaiba an gabos na linalang,  
talingkas sa karâtan nin kasâlan asin kagadanan,  
magpamuraway kami saimo huli ki Cristo samong Kagurangnan.**

**Benebendito an mga kamot.**

**na huli saiya winawaras mo an gabos na karahayan sa kinaban.**

116. **Kinukua an patena na may hostia asin an caliz, asin dungan na ibinabayaw na nagsasabi:  
Huli saiya, asin kaiba niya, asin sa saiya,  
saimo Dios Amang makakamhan,  
kasarô ka Espiritu Santo,  
an gabos na kagalangan asin kamurawayan,  
sa gabos na kapanahonan kan mga panahon.**

**An banwaan nagrorokyaw:**

**Amen.**

**Dangan minasunod an Rito sa Pagcomunion, p. 39.**

## RITO SA PAGCOMUNION

124. Pakababaan an caliz asin patena, an padi benebendito an mga kamot na nagsasabi:

**Natukdoan kan mga nakakaligtas na tugon,  
asin pinatood kan diosnon na kaugalian,  
nangangahas kitang magsabi:**

*Mina-onat kan mga kamot asin, kaiba an banwaan, nagpapamibi:*

**A** ma niamo, na yaon sa langit:  
pabanalon an ngaran mo;  
magdatong an kahadean mo;  
mangyari an boót mo sa dagâ nin siring sa langit.  
An samong kakanon sa aroaldaw itao mo samuya ngonian,  
asin patawadon mo kami sa samong mga kasâlan,  
siring na pinapatawad niamo an mga nagkakasalà samuya;  
asin hare kami pagdaraha sa sugot;  
kundi agawa kami sa maraot.

125. Naka-onat an mga kamot, an padi solong minapadagos na nagsasabi:

**Agawa kami sa gabos na maraot, namimibi kami Kagurangnan;  
warasan sa mga aldaw niamo an katoninongan,  
tanganing kaming natabangan kan saimong pagkaherak  
magin danay na talingkas sa kasâlan  
asin man ligtas sa gabos na kapurisawan:  
mantang kami naghahalat kan maogmang paglaom  
asin pagdatong kan samong Paraligtas na si Jesu Cristo.**

*Benebendito an mga kamot.*

*Tinatapos kan banwaan an pamibi, nagrorokyaw:*

Huli ta saimo an kahadean,  
asin an kapangyarihan, siring man an kamurawayan  
sa mga kapanahonan.

126. **Dangan an padi, naka-onat an mga kamot, nagsasabi sa sayod na tingog:**

**Jesu Cristong Kagurangnan,  
ika na nagsabi sa saimong mga Apostoles:  
Katoninongan iwinawalat ko saindo,  
an sakong katoninongan itinatao ko saindo:  
hare paghilinga an samong mga kasâlan,  
kundi an pagtubod kan saimong Simbahan;  
asin papagkanigoa na siya mapatoninong asin magkaboronyog  
susog sa saimong kabôtan.**

**Benebendito an mga kamot.**

**Ika na nabubuhay asin naghahade  
sa kapanahonan kan mga panahon.**

**An banwaan minasimbag:**

**Amen.**

127. **Nakaatubang sa banwaan, an padi inoonat an mga kamot dangan benebendito an mga kamot, nagdadagdag:**

**An katoninongan kan Kagurangnan danay na mapa-saindo.**

**An banwaan minasimbag:**

**Asin sa saimong espiritu.**

128. **Dangan, kun pagmarhayon, an diacono o an padi minadagdag:**

**Magpatinaraohan kamo nin katoninongan.**

**Asin susog sa kinaugalian kan lugar, an gabos nagpapahayag nin katoninongan,  
pagkasararô asin pagkamoot sa lambang sarô; an padi nagpapahayag kan katoninongan sa  
diacono o sa ministro.**

129. **Dangan kinukua an hostia asin binabaak sa ibabaw kan patena, asin an sadit na kabtang ibinubugtak sa caliz na nagsasabi sa hilom:**

**Ining pagsalak kan Hawak asin Dugo  
kan Kagurangnan niatong si Jesu Cristo  
magdara satô na mga nag-aako kaini  
sa buhay na daing kasagkoran.**

130. **Mantang an minasunod kinakanta o sinasabi:**

Cordero kan Dios, na nagpaparà kan mga kasâlan kan kinaban:  
kaheraki kami.

Cordero kan Dios, na nagpaparà kan mga kasâlan kan kinaban:  
kaheraki kami.

Cordero kan Dios, na nagpaparà kan mga kasâlan kan kinaban:  
tawi kami nin katoninongan.

Pwede man ining ulit-uliton nin nagkapirang beses, kun napapalawig an pagbaak nin tinapay. Alagad sa huring pag-ulit sinasabi an tawi kami nin katoninongan.

131. **Dangan an padi, bendito an mga kamot, hilom na nagsasabi:**

**Jesu Cristong Kagurangnan, Aki kan Dios na buhay,  
ika, na sa pagboót kan Ama,  
sa tabang kan Espiritu Santo,  
nagtaong buhay sa kinaban huli kan saimong pagkagadan:  
agawa ako huli kaining orog kabanal mong Hawak asin Dugo  
sa gabos kong kasâlan asin gabos na karâtan:  
asin giboha akong danay na dayupot sa saimong mga tugon,  
asin dai mo nanggad itugot na ako makasuhay saimo.**

**O:**

**An pag-ako kan saimong Hawak asin Dugo,  
Jesu Cristong Kagurangnan,  
dai man lugod magin hukom asin padusa sako:  
kundi huli kan saimong pagkaherak,  
magin kalasag ko sa isip asin hawak,  
asin bulong sa nakakapa-omay.**

132. **An padi linuluhod an sarong tuhod, kinukua an hostia, iniitaas nin kadikit sa ibabaw kan patena o sa ibabaw kan caliz, asin atubang sa banwaan, nagsasabi sa malinaw na tingog:**

**U**ya an Cordero kan Dios,  
uya an nagpaparà kan mga kasâlan kan kinaban.  
Paladan an mga inapod sa pamanggi kan Cordero.

**Asin kaiba an banwaan, an padi nagdadagdag:**

**Kagurangnan, bako akong maninigo na ika magdagos sa sakuyang harong:  
alagad magtaram ka sana, asin an sakong kalag maomayan.**

133. *Asin an padi, atubang sa altar, hilom na nagsasabi:*  
**Atamanon man lugod ako kan Hawak ni Cristo  
sagkod sa buhay na daing kasagkoran.**  
*Asin magalang na nag-aako kan Hawak ni Cristo.*  
*Dangan kinukua an caliz asin hilom na nagsasabi:*  
**Atamanon man lugod ako kan Dugo ni Cristo  
sagkod sa buhay na daing kasagkoran.**  
*Asin magalang na nag-iinom kan Dugo ni Cristo.*
134. *Pakatapos, kinukua an patena o an copon, minarani sa mga macomunion, asin an hostia iniitaas, pinapahiling sa lambang sarô asin nagsasabi:*  
**An Hawak ni Cristo.**  
*An macomunion minasimbag:*  
**Amen.**  
*Dangan minacomunion.*  
*Siring man kaini an gigibohon kan diacono, kun siya mapacomunion.*
135. *Kun igwa nin macomunion kan Hawak asin Dugo, susunodon an pinagboboót na rito sa siring na kamugtakan.*
136. *Mantang an padi nag-aako kan Hawak ni Cristo, pinopônan na an Awit sa Comunion.*
137. *Pakatapos pagpacomunion, an padi, o an diacono o an acolito liniligin an patena sa ibabaw kan caliz asin man an caliz.*  
*Mantang naglilinig, an padi hilom na nagsasabi:*  
**An inako kan samong nguso, Kagurangnan,  
mapakinabangan man lugod niamo sa malinig na kalag,  
asin ining inako niamo digdi sa kinaban  
magin ming bulong na daing kasagkoran.**
138. *Dangan an padi pwedeng mabalik sa tukawan. Kun kaipuhan, pwedeng mag-ontok na toninong sa dikit na panahon, o sarong salmo o cantico nin pag-omaw o sarong awit pwedeng kantahon.*
139. *Dangan nakatindog sa tungod kan tukawan o kan altar, atubang sa banwaan, nakabendito an mga kamot, an padi nagsasabi:*  
**Mamibi kita.**  
*An gabos, kaiba an padi, toninong na magpapamibi sa dikit na panahon, kun dai pa ini ginibo. Dangan, naka-onat an mga kamot, an padi nagpapagadyi kan Pamibi Pakacomunion. Sa pagtapos kaini an banwaan nagrorokyaw:*  
**Amen.**

## RITO SA PAGTAPOS

140. Kun kaipuhan, isinusunod an mga halipot na paisi sa banwaan.
141. Dangan, ginigibo an pagpahumale. An padi, atubang sa banwaan, naka-onat an mga kamot, nagsasabi:

**An Kagurangnan mapa-saindo.**

An banwaan minasimbag:

Asin sa saimong espiritu.

An padi minabendicion sa banwaan na nagsasabi:

**B**endicionan man lugod kamo kan Dios na makakamhan:  
**An Ama, asin an Aki, ✠ asin an Espiritu Santo.**

An banwaan minasimbag:

Amen.

---

142. May mga aldaw o ocasion kun nuarin an formulang ini nin pagbendicion, susog sa mga rubrico, pinapagenotan nin orog na solemneng formula nin pagbendicion o nin pamibi para sa banwaan (*Cf. Missale Romanum, editio typica tertia, p. 606ss*).
- 

143. Sa Misa Pontifical, sinusulot kan celebrante an mitra asin, naka-onat an mga kamot, nagsasabi:

**An Kagurangnan mapa-saindo.**

An gabos minasimbag:

Asin sa saimong espiritu.

An celebrante nagsasabi:

**Pag-omawon an ngaran kan Kagurangnan.**

An gabos minasimbag:

Ngonian asin sagkod pa man.

An celebrante nagsasabi:

**An tabang satô yaon sa ngaran kan Kagurangnan.**

An gabos minasimbag:

Na naggibo kan langit asin dagâ.

Dangan kinukua kan celebrante an baculo, kun ginagamit niya ini, asin nagsasabi:

**Bendicionan kamo kan Dios na makakamhan,**

Mantang nagbebendicion sa banwaan kan tolong tanda kan cruz, siya nagdadagdag:  
**an Ama, ✠ asin an Aki, ✠ asin an Espiritu ✠ Santo.**

Gabos:

Amen.

---

144. Dangan, an diacono o an padi mismo, bendito an mga kamot asin nakaatubang sa banwaan, nagsasabi:

**Lakaw kamo sa katoninongan ni Cristo.**

An banwaan minasimbag:

Salamat sa Dios.

145. Dangan, susog sa kinaugalian, an padi hinahadokan an altar sa pagtaong-galang siring sa pagpoon. Pakatapos na magduko nin hararom kaiba an mga ministro, siya naghahale.

146. Kun igwa nin masunod tulos na iba pang liturgia, an pagpahumale dai na ginigibo.



# **MGA PAMIBI SA NOVENA**

Miercoles  
ENOT NA ALDAW KAN NOVENA

**M**amomoton asin Maheherakon na Kagurangnan,  
huli kan saimong pagkamoot asin dakulang pagkaherak  
sa gabos na katawohan, binoót mo na humilig ka  
digdi asin mabuhay siring sa samuya.

An saimong pagkamundag, nagdara sa kinaban  
nin bâgong liwanag asin man nagtao samuya  
nin bâgong paglaom na sa huring aldaw  
kami man mamumundag-liwat sa bâgong buhay  
nin pakisumarô sa kamurawayan mo.

Kagurangnan, ipahiling mo samo an saimong Banal na Lalawgon  
tanganing mautob niamo an saimong kabôtan  
asin mahiling niamo an saimong Lalawgon sa samong kapwa;  
na sinda samong galangan asin kamotan.

Itao mo man lugod samuya  
an samong hinahagad asin minamawot  
kun iyan para sa saimong orog na kamurawayan  
asin para sa karahayan nin samong kalag. Amen.

Jueves  
IKADUWANG ALDAW NOVENA

**M**amomoton na Jesus,  
kan aldaw na dinalaw ka kan mga pastores  
asin kan mga mago, pinahiling mo sa bilog na katawohan  
an gayon asin kabanalan kan saimong Lalawgon,  
na yong sukat ikamidbid saimo kan gabos na katawohan.  
Ipinahayag mo samuya an saimong kapangyarihan  
asin katuyohan kan saimong Lalawgon  
na iyo an burabod nin kabanalan  
tanganing samuyang makamtan an katotoohan.  
Warasan man sa samo an samong kahagadan asin kamawotan  
kun ini ikaka-orog kan saimong kamurawayan  
asin para man sa karahayan kan samong kalag. Amen.

Viernes  
IKATOLONG ALDAW KAN NOVENA

**M**aheherakon na Kagurangnan,  
kan aldaw na ika nag-akô kan bonyag ni San Juan Bautista  
duman sa salog nin Jordan  
saimong itinukdo an kahalagahan kan pagsolsol  
asin pagbâgo nin buhay kan mga parakasala.  
Siring man sa aldaw na idto saimong pinônan an pag-utob  
kan saimong mision na iyo an pagligtas kan bilog na katawohan.  
Tinogdas mo an Sacramento nin Pagbonyag  
tanganing mahugasan kami kan kasâlan na original,  
siring man inako niamo an mision na magin instrumento  
asin katabang ni Jesu Cristo sa pagligtas kan samong kapwa.  
O Jesus, burabod nin kaligtasan asin kusog niamo,  
pakusogon samo an espiritu nin mision,  
an pagpapahalaga bako sana kan sadiring kapakanan  
kundi siring man an kaligtasan nin samong kapwa,  
tawan samo an balaog na samuyang minamawot asin hinahagad sa  
misang ini kun magkakanigo sa saimong orog na kamurawayan  
asin para man sa karahayan nin samong kalag. Amen.

Sabado  
IKA-APAT NA ALDAW KAN NOVENA

**O** Jesus, huli kan saimong Transfiguracion,  
ipinahiling mo an kamurawayan kan saimong pagka-Dios.  
Nagbanaag an saimong Banal na Lawog  
na iyong sukat na dahilan kan paglaad nin pagkamoot  
kan saimong mga piniling apostoles.  
Ika an kapanoan asin kabilogan  
kan pagpahayag nin Mahal na Dios sa diosnon na kamawotan.  
O Maboót na Maestro, tukdoan samo an dalan pasiring sa Ama,  
pahilingan sa samo an saimong kamurawayan,  
minamawot niamo na iwaras mo samo an samong kahagadan  
kun iyan para sa saimong orog na kamurawayan  
asin para man sa karahayan nin samong kalag. Amen.

Domingo  
IKA-LIMANG ALDAW KAN NOVENA

**M**augayon na Kagurangnan,  
naglibot ka sa bilog na rona nin Judea  
sa pag-utob kan kabôtan nin Ama.  
Kadakul an nakahiling saimo asin nakadangog  
kan saimong mga katukdoan.  
Kadakul an naomayan kan saindang mga kahelangan  
huli kan saimong pagkaherak.  
Maomayan man lugod kami sa kahelangan  
nin samong hawak asin kalag na iyo an samong kasâlan.  
Lugod madangog mi an saimong katukdoan  
asin maka-utob kami sa saimong kabôtan.  
Tanganing sa huring aldaw mahiling mi  
an saimong Banal na Lalawgon.  
Hinanyoga an samong mga kahagadan asin kamawotan  
kun iyan para man sa saimong kamurawayan  
asin para man sa karahayan nin samong kalag. Amen.

Lunes  
IKA-ANOM NA ALDAW KAN NOVENA

**M**apakumbabang Kagurangnan,  
itinugot mo na linigan ni Veronica an saimong Lalawgon.  
Huli sa kasâlan kan katawohan,  
an saimong lalawgon nagpahayag nin pagsakit asin kamundoan.  
Huli kan saimong pagkamoot natala an saimong Lalawgon  
duman sa lienso na ginamit ni Veronica.  
Kagurangnan tugoti man na matala  
sa samong puso asin isip an saimong Banal na Lawog  
tanganing makapaghingowa kaming magin maninigo  
sa pag-ako kan saimong biyaya,  
asin danay kaming makasunod sa saimo sa dalan  
nin pagsakit pasiring sa kamurawayan nin kaligtasan.  
Hinahagad mi an samong mga kaipuhan sa pagkabuhay  
kun iyan papagkanigoon mo para sa saimong kaomawan  
asin para man sa karahayan nin samong kalag. Amen.

Martes  
IKA-PITONG ALDAW KAN NOVENA

**O** Matinios na Paratubos,  
inako mo an gabos na kasakitan  
na dara kan mga gaweng maraot kan mga kaiwal.  
An saimong banal na hawak hinampak kan berdugo,  
kinoronahan ka nin mga tonok, pinâsan mo an cruz,  
ipinako ka sa cruz asin nagadan.  
Ini gabos saimong inako nin may dakulang kapakumbabaan,  
huli kan saimong daing katapusan na pagkamoot sa samuya.  
Pinabulos mo an saimong banal na dugo  
tanganing kami mahugasan kan samong mga kasâlan  
asin mabuksan sa samo an napintong tata nin kalangitan.  
O Jesus, naghoholaw kami  
kan mga naginibo niamong kaaliwalasan asin kapabayaan  
sa pagsunod kan saimong kabôtan.  
Minamawot niamo na huli kan saimong pagsakit,  
pagkagadan sa cruz asin pagkabuhay-liwat,  
samuyang maako man an mga kasakitan na namamatean niamo  
sa aroaldaw na pagkabuhay bilang pakisumarô  
sa saimong pagsakit.  
Lugod siring saimo, malampasan mi man an mga pagsakit  
asin makaabot kami sa kamurawayan nin kaligtasan.  
Tawan samo an hinahagad niamo  
kun iyan para sa saimong kamurawayan  
asin para man sa karahayan nin samong kalag. Amen.

Miercoles  
IKA-WALONG ALDAW KAN NOVENA

**O** Mamurawayon na Jesus, samong Kagurangnan,  
huli kan saimong pagkabuhay-liwat,  
dinaog mo an kasâlan asin an kagadanan.  
Tinawan mo kami nin bâgong buhay.  
Binâgo mo an lalawgon nin bilog na linalang  
sa paagi kan saimong gawe nin kaligtasan.  
Sa kaligtasan yaon an saimong mamurawayon na Lalawgon  
na ipinahiling mo ki Santa Maria Magdalena asin sa mga apostoles.  
Huli kan saimong pagkabuhay-liwat,  
bâgoha man kami asin tugoti na maninigong makabaing saimo  
tanganing sa huring aldaw kami man mabuhay-liwat.  
Warasan sa samo an mga biyaya na samong kaipuhan  
orog nang gayo an samong hinahagad  
kun iyan para sa saimong orog na kamurawayan  
asin para man sa karahayan nin samong kalag. Amen.

Jueves  
IKA-SIYAM NA ALDAW KAN NOVENA

**M**amurawayon asin mamomoton na Kagurangnan,  
huli kan saimong pagsakat sa langit,  
iwinalat mo samo an pagpadagos kan mision nin pagligtas  
kan gabos na parakasalà,  
siring man ipinahiling mo an orog na kamurawayan  
kan saimong pagka-Dios na nasaksihan  
kan saimong mga apostoles sa saimong lalawgon.  
An saimong pagsakat sa langit  
lugod maging burabod nin pagtubod asin paglaom niamo  
na sa huring aldaw kami man makakasakat sa kamurawayan  
na saimong pinag-andam para sa samo.  
Kagurangnan, samong dalan, katotoohan asin buhay,  
pasunoda kami sa saimong kahadean.  
Tawan samo sa buhay na ini an samong hinahagad  
kun iyan para sa saimong orog na kamurawayan  
asin para man sa karahayan nin samong kalag. Amen.

## PAMIBI KI DIVINO ROSTRO

An banwaan nakaluhod, pinapangadyi an pamibi ki Divino Rostro:

**O** Jesus, sa saimong makuring pagsakit,  
ika nagin niamong pangarogan.

Sa saimong makalunos-lunos na Lalawgon,  
yaon an dakulang pagkamoot.

Nagpupuspos ako kan saimong kamawotan na ika kamotan  
asin kamotan kan gabos siring man.

Inoomaw ko an saimong banal na Lalawgon  
ta ini an ladawan kan satong Ama sa langit.

An luha sa saimong mga mata garo mga perlas  
na minamawot kong makua asin ma-iatang para sako  
asin para sa gabos na makasâlan.

O Jesus, palaada ako kan saimong pagkamoot  
tanganing magin kagustohan ko sana  
an paghorop-horop kan mamurawayon mong Lawog.  
Amen.



**MGA PAMIBI NIN BANWAAN**

Miecoles  
ENOT NA ALDAW

Para sa mga Familia asin mga Kaakian

Pataratara kan padi:

**Mga tugang, huli sa biyaya nin bonyag  
pinapagkanigo kitang apodon an Dios bilang satuyang Ama,  
asin kita saiyang mga aki.  
Sa bilog na pagsarig magdolok kita sa Ama  
na danay na nagpapamate kan saiyang maka-amang pangataman.**

**S. Kagurangnan, hinanyoga an samong pamibi.**

Mga pag-arang:

1. Tanganing an mga namamayo kan Simbahan  
lugod magin masigasig sa paghulit kan Marahay na Bareta,  
ini lugod makalakop saen man na lugar,  
asin sa saindang paarog madara an gabos  
sa maimbod na pag-utob  
kan saindang katongdan bilang binonyagan,  
ipamibi niato sa Kagurangnan.  
**S. Kagurangnan, hinanyoga an samong pamibi.**
2. Tanganing an mga pamayo kan satong nacion,  
hingowahon lugod ninda an pagkakaigwa nin katoninongan  
asin pagkasararô sa gobierno para sa karahayan kan kagabsan,  
ipamibi niato sa Kagurangnan.  
**S. Kagurangnan, hinanyoga an samong pamibi.**
3. Tanganing an mga dukha,  
victima nin injusticia asin pang-aapi asin an mga naghehelang:  
lugod dai sinda makalingaw sa pag-arang sa Dios,  
kumusog an saindang pagsarig asin paglaom  
sa mamomoton na pangataman kan Ama,  
ipamibi niato sa Kagurangnan.  
**S. Kagurangnan, hinanyoga an samong pamibi.**

4. Tanganing an gabos na mga familia,  
lugod magkaigwa nin katoninongan asin pagkamoot  
sa saindang mga harong;  
na an mga nakakamatua masabotan an mga jvenes,  
asin tawanan sinda nin pagkakataon  
na magtalubo sa saindang paagi,  
ipamibi niato sa Kagurangnan.

**S. Kagurangnan, hinanyoga an samong pamibi.**

5. Tanganing kita gabos na mga binonyagan,  
magtalubo man lugod sato an mga biyayang inako sa bonyag  
sa paagi kan danay na pagmidbid ki Cristo,  
ipamibi niato sa Kagurangnan.

**S. Kagurangnan, hinanyoga an samong pamibi.**

**Pamibi kan padi:**

**O Dios na samuyang Ama,  
aram mi na kami saimong namomotan,  
tinugotan mo na apodon kaming saimong mga aki,  
tabangan mo kami na magin maninigo sa pagkamoot mo.  
Huli ki Cristo samong Kagurangnan.**

**S. Amen.**

Jueves  
IKADUWANG ALDAW  
Para sa mga Jovenes

Pataratara kan padi:

**Mga tugang, mamibi kita sa Dios, Ama niato na yaon sa langit:  
an saiyang Aki nanuga na anoman an hagadon niato sa Ama  
sa saiyang ngaran, itatao satuya.**

**S. Kagurangnan, hinanyoga an samong pamibi.**

Mga pag-arang:

1. Tanganing an banal na Simbahan malinigan  
sa paagi kan mga kasakitan kan mga panahon na ini;  
asin man an mga kapadian, religiosos asin misioneros  
magin tunay na maimbod ki Cristo, an tunay na balagon,  
sa paagi kan saindang paghingowa na ikasabuhay  
an banal na Evangelio sa dalan nin pagkamoot sa kapwa,  
ipamibi niato sa Kagurangnan.

**S. Kagurangnan, hinanyoga an samong pamibi.**

2. Tanganing an mga pamayo kan satuyang nacion,  
na dai man lugod sinda malingaw  
kan saindang mga ipinangako sa banwaan,  
na magtao sinda nin toltol asin madonong  
na pagpasunod na magin sindang tunay na halimbawa  
kan satuyang mga kaakian, ipamibi niato sa Kagurangnan.

**S. Kagurangnan, hinanyoga an samong pamibi.**

3. Tanganing ngonian asin sagkod pa man an mga jovenes  
sa satong comunidad dai masupog  
sa pagpahayag kan Evangelio,  
na magkaigwa sinda nin isog nin boót  
na magin tanda nin pagkasalungat  
sa mga pinapahalagahan kan kinaban,  
ipamibi niato sa Kagurangnan.

**S. Kagurangnan, hinanyoga an samong pamibi.**

4. Tanganing an banwaan nin Dios dai magkabaranga,  
dai nin siisay man na basang sanang magsunod  
sa mga bâgong palakaw kan kinaban,  
siring man na dai siisay man na matagas magpadagos  
sa mga daan na palakaw, ipamibi niato sa Kagurangnan.

**S. Kagurangnan, hinanyoga an samong pamibi.**

5. Tanganing an Dios,  
padarahan kita nin mga tawo na orog sa kardonongan,  
na an saindang mga tataramon makatalingkas  
asin makatao nin buhay, lugod kita saindang tukdoan  
na bayaan an mga bagay na dai nin saysay  
asin magin bukas sa bâgong kapinônan  
nin huli ta ini an kabôtan nin Mahal na Dios,  
ipamibi niato sa Kagurangnan.

**S. Kagurangnan, hinanyoga an samong pamibi.**

**Pamibi kan padi:**

**Kagurangnan, ika an samong paalawan asin kusog,  
yaon saimo an bilog niamong paglaom,  
kaheraki kami asin tawan samo an samong inaarang.  
Huli ki Cristo samong Kagurangnan.**

**S. Amen.**

Domingo  
IKATOLONG ALDAW  
Para sa mga Religiosos

Pataratara kan padi:

**Huli sa pagkamoot nin Ama asin kan Aki sa sato ipinadara an Espiritu Santo tanganing magsurog asin mag-antabay sa satuya sa gabos na panahon. Mamibi kita na danay man lugod kitang maglakaw na ginigiyahan kan Espiritu nin Dios.**

**S. Kagurangnan, hinanyoga an samong pamibi.**

Mga pag-arang:

1. Tanganing an Espiritu nin kadonongan an mga pamayo kan Simbahan, an Santo Papa, mga obispo asin kapadian sa saindang pagtukdo asin paarog danay na magiyahan an katawohan pasiring sa kabanalan, ipamibi niato sa Kagurangnan.

**S. Kagurangnan, hinanyoga an samong pamibi.**

2. Tanganing an mga pamayo kan gobierno warasan man lugod kan mga balaog nin hararom na pakasabot asin marhay na paghatol tanganing an mga programa na saindang ipinapasunod magbunga nin marhay asin magdara nin kauswagan sa banwaan, ipamibi niato sa Kagurangnan.

**S. Kagurangnan, hinanyoga an samong pamibi.**

3. Tanganing an Dios antabayan an gabos na religiosos asin religiosas siring man an mga tawong inapod mong magin misionero saen man sa kinaban, na sa paagi kan Espiritu Santo magkaigwa nin isog nin boót na ikabalangibog an Evangelio, magin bukas an saindang puso sa gabos na tawo asin magin sindang dusay sa pangataman kan mga pinakadukha asin daing sukat, ipamibi niato sa Kagurangnan.

**S. Kagurangnan, hinanyoga an samong pamibi.**

4. Tanganing an mga maluluya asin daing sinasandigan,  
an mga dukha, nagtitios, asin nawawaran nin paglaom  
tanganing magkaigwa nin kusog nin boót  
asin pagsarig sa saimong pag-ampon,  
ipamibi niato sa Kagurangnan.

**S. Kagurangnan, hinanyoga an samong pamibi.**

5. Tanganing an pagkamoot sa puso nin lambang sarô,  
haleon an pagkabaranga asin dai pagkasinarabotan  
lugod makamtan an katoninonagan asin pagkasararô,  
ipamibi niato sa Kagurangnan.

**S. Kagurangnan, hinanyoga an samong pamibi.**

**Pamibi kan padi:**

**Amang makakamhan, nagpapasalamat  
kami sa saimong padagos na pag-antabay sa samo,  
sa paagi kan paggiya kan saimong Espiritu,  
mautob mi man lugod an saimong kabôtan  
asin makapaglingkod man kami sa kapwa  
na mayong hinahalat na balos.**

**Huli ki Cristo samong Kagurangnan.**

**S. Amen.**

Lunes  
IKA-APAT NA ALDAW

Para sa mga Laiko asin mga Nagtatarabaho sa mga Parokya

Pataratara kan padi:

**Magdolok kita sa satuyang Amang maheherakon asin mapagpatawad.**

**Ipahayag niato sa saiya an satuyang mga pamibi asin kamawotan sa mga pamibi asin kamawotan.**

**S. Kagurangnan, hinanyoga an samong pamibi.**

Mga pag-arang:

1. Tanganing an satuyang Santo Papa si **N.**, mga obispo asin kapadian, lugod danay na magin maimbod sa saindang ministerio orog na sa pagwaras kan biyaya nin kapatawaran sa mga nagkasalà sa Sacramento nin pakikipag-ulian, magbunga lugod nin pagigin tunay na instrumento sa pagkasararô asin katoninongan, ipamibi niato sa Kagurangnan.  
**S. Kagurangnan, hinanyoga an samong pamibi.**
2. Tanganing an mga pamayo kan gobierno sa bilog na kinaban, lugod paorogon an tunay na paglingkod para sa karahayan kan mga namamanwaan, maghade man lugod sa saindang mga puso an katanosan asin pagpatawad, ipamibi niato sa Kagurangnan.  
**S. Kagurangnan, hinanyoga an samong pamibi.**
3. Tanganing an mga nagtitios, naghehelang, nangangaipo asin mga biktima nin pang-aabuso, lugod mamatean ninda an pangataman asin pagkamoot nin Dios sa paagi kan mga tawong nagtatabang sa sainda, ipamibi niato sa Kagurangnan.  
**S. Kagurangnan, hinanyoga an samong pamibi.**

4. Tanganing an mga tugang niatong gadan,  
lugod makamtan ninda an kapatawaran  
kan saindang mga kasâlan  
asin makaibahan nin Dios sa kamurawayan,  
ipamibi niato sa Kagurangnan.

**S. Kagurangnan, hinanyoga an samong pamibi.**

**Pamibi kan padi:**

**Dios na samuyang Ama, salamat sa pagkamoot mo samuya,  
hare kami pagpabayae na madaog nin sugot  
asin makasuhay sa saimo,  
pakihinanyoga an samong mga pamibi  
kun ini susog sa banal mong kabôtan.  
Huli ki Cristo samong Kagurangnan.**

**S. Amen.**

Martes  
IKA-LIMANG ALDAW

Para sa mga Paratukdo asin mga *Media Practitioners*

Pataratara kan padi:

**Idusay ta an satong sadiri sa Dios na satuyang Ama  
asin hagadon ta sa saiya na danay niyang itao sato si Jesus,  
na saiyang bugtong na Aki,  
na makasarô ta sa satuyang mga kaogmahan  
siring man sa satuyang mga kasakitan.**

**S. Kagurangnan, hinanyoga an samong pamibi.**

Mga pag-arang:

1. Tanganing an Simbahan na nagbabaklay,  
lugod an saiyang mga pamayo  
siring man kan saiyang mga kaayon  
atubangon an mga kadificilan asin mga kasakitan  
nin pagbabâgo na igwa nin kusog boót  
sagkod paglaom sa orog karahay na pagsabuhay kan Evangelio,  
ipamibi niato sa Kagurangnan.

**S. Kagurangnan, hinanyoga an samong pamibi.**

2. Tanganing an mga namamayo kan gobierno,  
hanapon lugod ninda an karahayan kan kagabsan  
sa paagi nin katanosan, pag-anduyog sa mga maluya  
asin sa pagsurog sa gabos na anoman na makakaraot  
kan tama asin kan pagkabuhay, ipamibi niato sa Kagurangnan.

**S. Kagurangnan, hinanyoga an samong pamibi.**

3. Tanganing an mga media nin comunicacion,  
an mga nasa radio, televisión, sine asin periodico,  
na dai man lugod ninda pagbirikon an mga tataramon  
o ano pa man na nakakapurisaw  
kan mga tamang pagpapahalaga kan pagkabuhay nin tawo,  
tanganing sa Dios hanapon ninda an dayaday na katotoohan,  
ipamibi niato sa Kagurangnan.

**S. Kagurangnan, hinanyoga an samong pamibi.**

4. Tanganing an mga magurang,  
mga paratukdo asin an gabos kabtang nin educacion,  
na sainda lugod na maagyat an mga kaakian  
na mabuhay para sa tama  
asin sa mga bagay na tunay na mahalaga,  
ipamibi niato sa Kagurangnan.

**S. Kagurangnan, hinanyoga an samong pamibi.**

5. Tanganing an gabos na igwa nin kasakitan  
orog na idtong dai na nin paglaom na maomayan,  
maabot lugod ninda an saindang tinitios na kulog  
sa kaibahan ni Jesus asin idolot iyan sa Ama  
bilang kabayaran kan saindang sadiring mga kasâlan  
asin kan kasâlan nin bilog na kinaban,  
ipamibi niato sa Kagurangnan.

**S. Kagurangnan, hinanyoga an samong pamibi.**

**Pamibi kan padi:**

**Kagurangnan, Dios nin pagkamoot,  
lilingya akua an samong mga solemneng pamibi,  
makamtan mi man lugod an saimong magaya-gayang pagkaherak.  
Huli ki Cristo samong Kagurangnan.**

**S. Amen.**

Miercoles  
IKA-ANOM NA ALDAW  
Para sa mga may Helang, mga Gurang

Pataratara kan padi:

Sararô sa pagtubod bilang sarong banwaan nin Dios,  
mamibi kita sa satuyang langitnon na Ama  
na nagboót na kita magkatiripon,  
para sa pangangaipo kan simbahan asin kan bilog na banwaan.

**S. Kagurangnan, hinanyoga an samong pamibi.**

Mga pag-arang:

1. Tanganing papagdanayon kan Dios sa pagkasararô  
an mga lideres kan Simbahan sa bilog na kinaban,  
an Santo Papa si **N.**, mga obispo asin kapadian,  
sa saindang paarog asin pamamayo  
madara lugod an katawohan  
sa dayupot na pakisumarô sa Kagurangnan,  
ipamibi niato sa Kagurangnan.

**S. Kagurangnan, hinanyoga an samong pamibi.**

2. Tanganing an mga lideres nin mga nacion sa bilog na kinaban,  
orog na sa samuyang sadiring nacion,  
bolonga an lugad nin pagkabaranga asin tugoti  
na an mga namamanwaan mag-erok sa katoninongan  
asin tunay na pagkasararô, ipamibi niato sa Kagurangnan.

**S. Kagurangnan, hinanyoga an samong pamibi.**

3. Tanganing buksan man an puso asin palad  
kan mga nasa kaginhawahan  
para sa mga dukha asin mga nagtitios,  
huli sainda mamatean man lugod kan mga kapos-palad  
an pagkamoot nin Kagurangnan  
asin magdanay na sarô sa Simbahan,  
ipamibi niato sa Kagurangnan.

**S. Kagurangnan, hinanyoga an samong pamibi.**

4. Tanganing an mga doctor, mga *nurses* asin mga *social workers* asin gabos na mga nangangataman kan karahayan nin mga may helang, maluluya asin an mga orog na nangangaipo sa laog kan sociedad, itao lugod ninda an saindang kakayahan sa pagkamoot asin pagpangataman sa mga nangangaipo sainda susog sa paarog ni Cristo, ipamibi niato sa Kagurangnan.

**S. Kagurangnan, hinanyoga an samong pamibi.**

5. Tanganing magtalubo man sa pagkamoot asin pagkasararô an gabos sa yaon sa celebracion kan Eucaristia ngonian, tabangan man lugod na mabuhay bilang mga tunay na disipulos ni Cristo tanganing matalâ sa lambang sarô an saiyang banal na lawog, ipamibi niato sa Kagurangnan.

**S. Kagurangnan, hinanyoga an samong pamibi.**

**Pamibi kan padi:**

**Salamat Ama, sa danay mong pangataman samuya, papagkanigoa na makamtan niamo an samuyang mga kahagadan asin daraha man kami sa dayupot na pakisumarô sa Kagurangnan. Siya na nabubuhay asin naghahade sa kanapahonan kan mga panahon.**

**S. Amen.**

Jueves  
IKA-PITONG ALDAW

Para sa mga Nagtitios asin mga nasa Bilanggoan

Pataratara kan padi:

**Si Jesus, an halangkaw na Padi  
an tagapag-ultanan nin Dios asin tawo.  
Huli saiya, kita minadolok sa Ama sa pag-omaw asin pagsamba  
asin sa pagpamibi para sa simbahan asin sa bilog na banwaan.**

**S. Kagurangnan, hinanyoga an samong pamibi.**

Mga pag-arang:

1. Tanganing an mga lideres kan Simbahan sa bilog na kinaban,  
an Santo Papa si **N.**, mga obispo, mga padi asin diacono,  
magdanay lugod sindang maimbod sa pag-utob kan ministerio  
na saindang pinanugaan, ipamibi niato sa Kagurangnan.

**S. Kagurangnan, hinanyoga an samong pamibi.**

2. Tanganing maliwanagan an isip kan mga lideres  
kan satuyang nacion, mahiling lugod ninda  
kun ano an nakakarahay o nakakaraot sa saindang palakaw  
kan gobierno asin magkaigwa lugod nin kusog-boót  
tanganing panindogan kun ano an tama  
asin matanos para sa gabos, ipamibi niato sa Kagurangnan.

**S. Kagurangnan, hinanyoga an samong pamibi.**

3. Tanganing an mga nagmumundô, inaapi,  
asin nagagabatan sa buhay,  
dai lugod sinda mawaran nin paglaom kundi idolot  
an saindang kasakitan sa Kagurangnan  
para sa kaligtasan nin kinaban,  
ipamibi niato sa Kagurangnan.

**S. Kagurangnan, hinanyoga an samong pamibi.**

4. Tanganing bendicionam kan Kagurangnan  
an mga naghahanap saiya, siring man  
an mga nasa pagduwa-duwa, an mga may helang, an mga ilo,  
an mga balo, idtong mga nagmumundô,  
sagkod idtong igwa nin mga magabat na pâsanon sa buhay,  
tawe sinda nin paglaom, giboha na an lambang sarô  
maghingowa na ipamate sainda an saimong pagkamoot,  
ipamibi niato sa Kagurangnan.

**S. Kagurangnan, hinanyoga an samong pamibi.**

5. Tanganing an mga pinagdaog-daog  
asin mga dai nin kapangyarihan,  
an mga nasa bilanggoan na lugod dai ninda paghonaon  
na an saindang dukhang pagkabuhay iyo an kabôtan kan Dios  
para sa sainda kundi matalastas man lugod ninda  
na sinda man inaapodan na magin talingkas,  
ipamibi niato sa Kagurangnan.

**S. Kagurangnan, hinanyoga an samong pamibi.**

**Padi:**

**Amang mamomoton,  
paki-akoa an pamibi na idinodolot kan saimong banwaan  
asin itugot mo lugod na makamtan niamo  
an samong mga kahagadan.**

**Huli ki Cristo samong Kagurangnan.**

**S. Amen.**

Viernes  
IKA-WALONG ALDAW  
Para sa mga Padi asin mga Seminarista

Pataratara kan padi:

**Panô nin pagsarig, mamibi kita sa Dios na satuyang Ama,  
an burabod nin satuyang kusog  
asin karangahan sa gabos na panahon.**

**S. Kagurangnan, hinanyoga an samong pamibi.**

Mga pag-arang:

1. Tanganing an mga namamayo kan Simbahan,  
na sa padagos na paglingkod sa Cristianong comunidad  
mamatean lugod kan katawohan an nakakapaomay  
na pagkamoot kan Dios,  
ipamibi niato sa Kagurangnan.

**S. Kagurangnan, hinanyoga an samong pamibi.**

2. Tanganing an mga lideres kan satuyang nacion,  
danay lugod na maghingowa sa pagtabang sa mga kasaraditan  
asin nangangaipo sa paagi kan saindang totoo  
asin dayupot na paglingkod sa banwaan,  
ipamibi niato sa Kagurangnan.

**S. Kagurangnan, hinanyoga an samong pamibi.**

3. Tanganing an mga nagtatrabaho sa mision kan Simbahan,  
na madara lugod ninda an kinaban  
sa comunidad nin Kagurangnan an manlaen-laen na derecho  
nin katawohan siring man an manlaen-laen na kultura  
o paagi nin pagkabuhay; darahon man lugod ninda si Cristo,  
an ilaw na nagbabanaag nin kaogmahan,  
pagkamoot asin katoningongan,  
ipamibi niato sa Kagurangnan.

**S. Kagurangnan, hinanyoga an samong pamibi.**

4. Tanganing an satuyang seminario asin mga seminarista,  
siring man an satuyang mga kapadian,  
ipinahiling lugod kan Dios an saiyang pagkamoot sa tawo  
sa paagi kan saiyang namomotan na aking si Jesus na nani-tawo  
siring samo tabangi sindang orog na magin arog ki Jesus  
asin ipadagos sa kinaban an saiyang mision  
kan pagdara nin kaligtasan asin katalingkasan sa gabos na tawo,  
ipamibi niato sa Kagurangnan.

**S. Kagurangnan, hinanyoga an samong pamibi.**

5. Tanganing kita na uya sa banal na bangkete ngonian,  
orog na an mga nagtabang sa banal na Misa,  
lugod magdanay na pusog an satong pagtubod  
asin magin instrumento sa pagdara kan Marahay na Bareta  
sa satuyang mga tugang, ipamibi niato sa Kagurangnan.

**S. Kagurangnan, hinanyoga an samong pamibi.**

**Pamibi kan padi:**

**Ama, danay kaming nagpapasalamat  
huli sa danay mong karahayan samuya,  
panô nin paglaom,  
idinodolot niamo giraray saimo an samong mga pamibi.  
Huli ki Cristo samong Kagurangnan.**

**S. Amen.**

Sabado  
IKA-SIYAM NA ALDAW

Para sa mga Lideres asin mga Nagtatrabaho sa Gobierno

Pataratara kan padi:

**ipamibi niato sa Kagurangnan  
na iwaras sato an gracia na satong kaipuhan  
tanganing makaheras kita sa karahayan niya  
asin makapaglingkod na may pagkamoot sa satong kapwa.**

**S. Kagurangnan, hinanyoga an samong pamibi.**

Mga pag-arang:

1. Tanganing sa pangataman kan saiyang mga lideres,  
an Simbahan padagos na magin panalmingan  
nin tunay na paglingkod asin burabod nin paglaom  
kan mga maimbod sa Kagurangnan,  
ipamibi niato sa Kagurangnan.

**S. Kagurangnan, hinanyoga an samong pamibi.**

2. Tanganing mamidbidan kan mga lideres nin banwaan  
an oportunidad na makisumarô sa ministerio ni Cristo  
sa paagi kan saindang maimbod na paglingkod  
sa saindang mga nasasakopan,  
ipamibi niato sa Kagurangnan.

**S. Kagurangnan, hinanyoga an samong pamibi.**

3. Tanganing an mga dukha, mga naghehelang, mga bilanggo,  
mga biktima nin injusticia asin kariribokan  
makahâwas sa saindang kasakitan  
asin makamtan an saindang kamawotan,  
ipamibi niato sa Kagurangnan.

**S. Kagurangnan, hinanyoga an samong pamibi.**

4. Tanganing an mga nagtatrabaho sa gobierno, dai man lugod ninda isikwal an tamang principio nin pagkabuhay huli na lamang sa kapangyarihan, ambicion asin kayamanan; ata ngani maghingowa na an sadiri magin kasangkapan sa pagpalangkaw kan dignidad nin tawo siring man kan mga katukdoan kan Evangelio, ipamibi niato sa Kagurangnan.

**S. Kagurangnan, hinanyoga an samong pamibi.**

5. Tanganing an kinaban nin ralaban, irirwal asin kariribokan, nin darayaan, corrupcion asin pag-abuso sa kapangyarihan, an mga tawo lugod na igwa nin integridad, siring man nin harayong pagtanaw asin pangiturogan, makakua nin pasabong gikan sa Evangelio dangan ibalik an kinaban sa tamang dalan nin pagkaminootan asin katoninongan, ipamibi niato sa Kagurangnan.

**S. Kagurangnan, hinanyoga an samong pamibi.**

**Pamibi kan padi:**

**Salamat Kagurangnan, sa danay mong karahayan samuya, dangoga man an pamibi nin saimong banwaan asin papagkanigoa na makamantan mi an samuyang mga kahagadan susog sa banal mong kabôtan. Huli ki Cristo samong Kagurangnan.**

**S. Amen.**

Viernes kan Enot na aldaw kan Novena ki Nuestra Señora de Peñafrancia

**DIVINO ROSTRO**  
**(BANAL NA LALAWGON)**

**Fiesta**

**Pataratara kan padi:**

**Kagurangnan, napanô kami nin pagsarig asin kusog huli kan Marahay na Bareta nin saimong Aki asin samuyang tugang, si Jesu Cristo. Ngonian nasabotan mi, na si Jesus danay na ipinapamibi kami saimo, samuyang langitnon na Ama. Panô kan siring na pagsarig asin pagtubod minadulok kami saimo.**

**S. Kagurangnan, akoa an samong pakimaherak.**

**Mga pag-arang:**

**1. Ama, Aki asin Espiritu Santo, rangaha an saimong Simbahan na nagugutom para sa comunidad, tanganing magin siyang bukas para sa lambang sarô, maginalang sa pagkakaiba nin kapwa-tawo asin magtinarabang-tabangan an gabos na katawohan para sa karahayan asin kauswagan kan gabos sa kabanalan, ipamibi niato sa Kagurangnan.**

**S. Kagurangnan, akoa an samong pakimaherak.**

**2. Ama, pabuluson mo an saimong pagkabuhay asin pagkamoot sa mga puso kan mga namamayo kan gobierno na danay lugod nindang masabotan an tunay na kahulugan kan paglingkod sa katawohan sa paagi nin katanosan, pag-anduyog sa mga maluya; makakua lugod sinda nin tunay na kaogmahan, magalang asin totoong pagsagibo kan saindang katungdan, ipamibi niato sa Kagurangnan.**

**S. Kagurangnan, akoa an samong pakimaherak.**

3. Ama, ipinahiling mo an saimong pagkamoot sa tawo sa paagi kan saimong namomotan na Aking si Jesus, tabangi kaming orog na mamoot sa samuyang kapwa, idtong mga nagtitios, nasa bilangoan, mga nangangaipo nin tabang, nasa ospital asin sa harong na naghehelang, tanganing minsan sinda nagkukulang sa mga pangangaipo nin saindang buhay asin kalag, mabuhay man lugod si Cristo sa sinda, ipamibi niato sa Kagurangnan.

**S. Kagurangnan, akoa an samong pakimaherak.**

4. Ama, ipinadara mo an saimong Espiritu tanganing magkaboronyog an lambang Cristiano, isubol mo an iyo man sanang Espiritu Santo na lugod an gabos na Cristianong Simbahan magpaginalang-galangan bilang mga disipulos ni Cristo, mamibdibdan lugod ninda an mismong Banal na Espiritu na nagtatrabaho sa sinda gabos siring man pinapasunod sinda sa dalan nin pagkasararô, ipamibi niato sa Kagurangnan.

**S. Kagurangnan, akoa an samong pakimaherak.**

5. Ama, kaglalang kan gabos na bagay asin kan kinaban, tabangi kami, an saimong mga linalang asin papagyamanon na kita lugod makanood na ikaogma an mga balaog nin buhay: an marahay na pakikipagkapwa-tawo, an pagkamoot, pagkasararô asin pagkasinarabotan, mga tawo na nakakatao nin kahulugan sa pagkabuhay asin pagkasararô, ipamibi niato sa Kagurangnan.

**S. Kagurangnan, akoa an samong pakimaherak.**

**Pamibi kan padi:**

**Kagurangnan, an saimong ngaran  
magin lugod kusog sa samuyang kaluyahan,  
ilaw sa samuyang kadikloman,  
ranga sa samuyang kasakitan, kalasag laban sa kaiwal  
asin kamurawayan duman sa buhay na daing kasagkoran.  
Huli ki Cristo samong Kagurangnan.**

**S. Amen.**



**KADAGDAGAN**

Viernes kan Enot na aldaw kan Novena ki Nuestra Señora de Peñafrancia

## DIVINO ROSTRO (BANAL NA LALAWGON)

Para sa mga Misa sa novenario, an mga babasahon kan aldaw an gagamiton.

### Enot na Babasahon

Isaias 52, 13-15; 53, 1-5

Alagad tinios niya an sakit na kuta para sato, an kulog na kita kuta an nagtios.

Pagbasa sa libro ni Profeta Isaias

**N**agsasabi an Kagurangnan,  
“Mag-uuswag an sakong surogon sa saiyang gibo;  
Ilalangkaw siya asin gagalangan.

Kadakul na tawo an nabigla kan mahiling siya;  
garo bako na siyang tawo,  
huli kan makuring nangyari sa saiyang itsura.

Alagad ngonian mangangalas saiya an dakul na nacion,  
asin sa pagngalas maalo an mga hade.

Huli ta mahihiling ninda an dai pa ninda nabaretaan,  
asin masasabotan ninda an dai pa ninda nadangog.”

Nagsimbag an mga tawo,

“Siisay daw an pwedeng  
magtubod sa samong ibinabareta?

Siisay daw an pwedeng nakahiling kan kamot nin  
Kagurangnan sa nangyaring ini?”

Kabôtan nin Kagurangnan na an saiyang surogon  
magtalubo siring sa sarong tinanom na nakagamot  
sa mamarang dagâ.

Mayo siya nin forma o dignidad  
tanganing madagka kitang hilingon siya;  
mayo nin kagayonan tanganing mawoton ta siya.

Pinag-olog-olog asin isinikwal ta siya;  
tinios niya an sakit saka kulog.

Mayo man lamang boót na maghiling saiya;  
pinag-olog-olog ta siya asin dai ginalangan.

“Alagad tinios niya an sakit na kuta para sato,  
an kulog na kita kuta an nagtios.

Naghona kita na an saiyang pagtios  
sarong padusa na hale sa Dios.

Alagad huli kan satong mga kasâlan linugad siya,  
huli kan ginibo tang karâtan hinampak siya.  
Nabolong kita huli kan padusa na saiyang tinios,  
naomayan kita huli kan mga hampak na saiyang inako.  
Tataramon kan Kagurangnan.

### **Salmo Responsorio**

Salmo 80, 1. 15-16. 18-19

**S.** Kagurangnan, ipahiling mo samo an saimong lalawgon  
asin kami maliligtas.

Dangoga kami, O Pastor nin Israel;  
himatea kami, ika na pamayo kan saimong mga karnero.  
Ika na nakatukaw sa trono sa ibabaw kan mga cerubin.

**S.** Kagurangnan, ipahiling mo samo an saimong lalawgon  
asin kami maliligtas.

An banwaan na itinanom kan saimong kamot,  
pinatalubo sagkod na pumusog.  
Sinulo iyan nin mga kaiwal asin pinalod;  
hilinga sinda asin tunawa kan saimong kaanggotan.

**S.** Kagurangnan, ipahiling mo samo an saimong lalawgon  
asin kami maliligtas.

Dai mi na naggad ika tatalikdan.  
Tawe kami nin buhay,  
asin aapodon mi an saimong ngaran.  
Kagurangnan, Dios nin mga hukbô, ibalik mo kami;  
pahilingan samo an saimong pagkaherak,  
asin kami makakaligtas.

**S.** Kagurangnan, ipahiling mo samo an saimong lalawgon  
asin kami maliligtas.

Nagpakadai siya sa sadiri, inako an kamugtakan nin sarong oripon, ipinangaki siring sa tawo.

**Pagbasa sa surat ni San Pablo sa mga taga-Filipos**

**A** rogon nindo an ginibo ni Cristo:  
Danay na nasa saiya an pagkani-Dios,  
alagad dai siya nagdayupot na pantayan an Dios,  
kundi nagpakadai siya sa sadiri,  
inako an kamugtakan nin sarong oripon,  
ipinangaki siring sa tawo.  
Kan siya nagin tawo, nagpakumbaba siya asin  
nagmakinuyog-kuyog sagkod sa kagadanan,  
sagkod sa kagadanan sa cruz.  
Huli kaini, initaas siya nin Dios  
dangan tinawan nin ngaran na orog sa gabos na ngaran.  
Kaya sa ngaran ni Jesus,  
maluhod an gabos sa langit, sa dagâ saka sa irarom kan dagâ,  
tanganing an gabos magpahayag na si Jesu Cristo  
iyo an Kagurangnan,  
sa kamurawayan nin Dios Ama.  
Tataramon kan Kagurangnan.

**Pagrokyaw bâgo an Evangelio**

Juan 14, 6-7

S. Alleluia, Alleluia.

Ako an dalan, an katotoohan asin an buhay;  
dai nin makakaduman sa Ama, kun bakong huli sako.  
Kun ako midbid nindo,  
midbid man kutana nindo an sakong Ama.

S. Alleluia, Alleluia.

Ipinako ninda siya sa cruz.

✠ Pagbasa kan Evangelio susog ki San Juan

**N**agluwas siya, pâsan an saiyang cruz pasiring sa lugar  
na inaapod “Lugar nin Bungo,”  
(sa tataramon na Hebreo, “Golgota.”)

Duman, ipinako ninda siya sa cruz, kaiba an duwa pang tawo—  
an sarô sa too niya, an sarô sa wala.

Nagsurat si Pilato nin sarong paísi na arog kaini an sinasabi:  
“Si Jesus na taga Nazaret, an Hade kan mga Judio,”  
dangan ipinabugtak ini sa itaas na parte kan cruz.

Dakul na Judio an nakabasa kaini,  
huli ta an lugar na pinagpakoan ki Jesus  
bakong harayo sa ciudad.

An paísi isinurat sa tataramon na Hebreo, Latin saka Griyego.

Sinabihan si Pilato kan mga poon na padi,

“Dai mo isurat na ‘Hade kan mga Judio,’ kundi, ‘  
An tawong ini nagsabi, Ako an Hade kan mga Judio.’”

Alagad nagsimbag si Pilato,

“An sinurat ko, sinurat ko na.”

Pakapakoan ki Jesus sa cruz kan mga soldados,  
kinua ninda an saiyang mga gubing saka pinag-apat,  
tigsararong parte sinda.

Alagad dai ninda binaranga an pang-irarom niyang bado.

An badong ini mayong takip;  
sarô sana ining pedasong hinabol.

Kaya nag-olay-olay an mga soldados,

“Dai ta ini pagtabason;

pagripahan ta na sana kun siisay an makakakua kaiyan.”

Nangyari ini tanganing mautob an kasuratan,

“Pinagbaranga ninda an sakong mga gubing;  
pinagripahan ninda an sakong bado.”

Ini an ginibo kan mga soldados.

Nakatindog harani sa cruz ni Jesus an saiyang ina,

saka an tugang na babae kan saiyang ina,

si Maria na agom ni Cleofas, asin si Maria Magdalena.

Kan mahiling ni Jesus an saiyang ina,

asin an disipulo na padangat niya sa kataed kaini,  
sinabihan niya an saiyang ina,  
"Babae, uya an saimong aki!"  
Dangan sinabihan niya an disipulo,  
"Uya an saimong ina!"  
Poon kaidto, inako kan disipulo an ina ni Jesus sa saiyang harong.  
Marahay na Bareta kan Kagurangnan.





# MISA SA KAOMAWAN NI DIVINO ROSTRO

## PASASALAMAT

An pagpublicar kan librong Misa sa Kaomawan ni Divino Rostro nagin posible sa paagi kan mga tabang kan mga minasunod:

- Rev. Fr. Luisito A. Occiano
- Rev. Fr. Eric P. Bobis
- Patrick Henry I. Balmaceda
- John Paul M. Aven
- Juan Carlos R. Madrid
- Jared Dale M. Estolloso
- Anthony M. Avila
- Vince Carlo M. Puno
- Mika Ella R. Fernandez

Lugod an Dios, sa paagi kan pagkaherak kan Mahal na Lawog kan saimong Aki, an Divino Rostro, bendicionan asin atamanon kamo.

## BIBLIOGRAFIA

*Leccionario.* (n.d.). Archdiocese of Caceres.

*Lectioary.* (n.d.). United States Conference of Catholic Bishops.

*Misal Romano sa Bicol* (Propio nin mga Santos asin Santas ed.). (n.d.). Bicol Regional Liturgy Committee.

*Roman Missal.* (2011). United States Conference of Catholic Bishops.

Ruiz, G. (2013). *Mga Pamibi asin Novena ki Divino Rostro.* Commission on Liturgy, Archdiocese of Caceres.

*Marahay na Bareta Biblia.* (1992). Philippine Bible Society.